

四部備要書目提要

(史部)

冊二

四部備要書目提要卷二（史部）

史記 一百三十卷

〔著者小傳〕司馬遷漢夏陽人談子字子長生龍門耕牧河山之陽年十歲誦古文二十而南游江淮上會稽探禹穴窺九疑浮沅湘北涉汶泗講學齊魯之邦過梁楚以歸仕爲郎中奉使巴蜀還爲太史令李陵降匈奴武帝怒甚遷極言陵忠下腐刑乃紬金匱石室之書上起黃帝下止漢武作史記一百三十篇序事辨而不華質而不俚劉向揚雄皆稱爲良史之材 裴駰南朝宋聞喜人松之子字龍駒仕至南中郎參事嘗採九經諸史并漢書音義著史記集解一百三十卷所引證多先儒舊說 司馬貞唐河內人字子正官朝散大夫弘文館學士撰史記索隱及補三皇紀三十卷自號小司馬以別之 張守節唐玄宗時人官諸王侍讀率府長史其學長於地理所著史記正義極賅博

〔四庫提要〕漢司馬遷撰褚少孫補遷事蹟具漢書本傳少孫據張

守節正義引張晏之說以爲潁川人元成闕博士又引褚顛家傳以

爲梁相褚大弟之孫宣帝時爲博士寓居沛事大儒王式故號先生

二說不同然宣帝末距成帝初不過十七八年其相去亦未遠也案

遷自序凡十二本紀十表八書三十世家七十列傳共爲百三十篇

漢書本傳稱其十篇闕有錄無書張晏注以爲遷歿之後亡景帝紀

武帝紀禮書樂書兵書漢興以來將相年表日者列傳三王世家龜

策列傳靳列傳劉知幾史通則以爲十篇未成有錄而已駁張晏

之說爲非今考日者龜策二傳並有太史公曰又有褚先生曰是爲

補綴殘稿之明證當以知幾爲是也然漢志春秋家載史記百三十

篇不云有闕蓋是時官本已以少孫所續合爲一編觀其日者龜策

二傳並有臣爲郎時云云是必嘗經奏進故有是稱其褚先生曰字

殆後人追題以爲別識歟周密齊東野語摘司馬相如傳贊中有揚

雄以爲靡麗之賦勸百而諷一之語又摘公孫弘傳中有平帝元始中詔賜弘子孫爵語焦竑筆乘摘賈誼傳中有賈嘉最好學至孝昭時列爲九卿語皆非遷所及見王懋竑白田雜著亦謂史記止紀年而無歲名今十二諸侯年表上列一行載庚申甲子等字乃後人所增則非惟有所散佚且兼有所竄易年祀繇邈今亦不得而考矣然字句竄亂或不能無至其全書則仍遷原本焦竑筆乘據張湯傳贊如淳註以爲續之者有馮商孟柳又據後漢書楊經傳以爲嘗刪遷書爲十餘萬言指今史記非本書則非其實也其書自晉唐以來傳本無大同異惟唐開元二十三年敕升史記老子列傳於伯夷列傳上錢曾讀書敏求記云尙有宋刻今未之見南宋廣漢張材又嘗刊去褚少孫所續趙山甫復病其不全取少孫書別刊附入今亦均未見其本世所通行惟此本耳至僞孫奭孟子疏所引史記西子金錢事今本無之蓋宋人詐託古書非今本之脫漏又學海類編中載僞

洪遵史記真本凡例一卷於原書臆爲刊削稱卽遷藏在名山之舊稿其事與梁鄱陽王漢書真本相類益荒誕不足爲據矣註其書者今惟裴駟司馬貞張守節三家尙存其初各爲部帙北宋始合爲一編明代國子監刊版頗有刊除點竄南監本至以司馬貞所補三皇本紀冠五帝本紀之上殊失舊觀然彙合羣說檢尋較易故今錄合併之本以便觀覽仍別錄三家之書以存其完本焉

史記集解宋裴駟撰駟以徐廣史記音義粗有發明殊恨省略乃採九經諸史并漢書音義及衆書之目別撰此書其所引證多先儒舊說張守節正義嘗備述所引書目次然如國語多引虞翻注孟子多引劉熙注韓詩多引薛君注而守節未著於目知當日援據浩博守節不能徧數也原本八十卷隋唐志著錄並同此本爲毛氏汲古閣所刊析爲一百三十卷原第遂不可考然註文猶仍舊本自明代監本以索隱正義附入其後又妄加刪削訛舛遂多如五帝本紀昔高

陽氏有才子八人句下高辛氏有才子八人句下俱脫名見左傳四
字秦始皇本紀輕車重馬東就食句下脫徐廣曰一無此重字八字
項羽本紀其九月會稽守句下脫徐廣曰爾時未言太守九字武帝
紀祠上帝明堂句下脫徐廣曰常五年一修耳今適二年故但祀明
堂十八字然其效可觀矣句下脫又數本皆無可字七字河渠書岸
善崩句下脫如淳曰河水岸六字司馬相如傳徬徨乎海外句下此
引郭璞云青邱山名上有田亦有國出九尾狐在海外太史公自序
易大傳句下此引張晏曰謂易繫辭監本均誤作正義至於字句異
同前後互見如夏本紀九江入賜大龜句下孔安國曰出於九江水
中監本作山中孝文本紀昌至渭橋句下引蘇林曰在長安北三里
監本多渭橋二字祁侯賀爲將軍句下引徐廣曰姓繒監本多一賀
字當有玉英見句下引瑞應圖云玉英五帝並修則見監本作五常

案五帝並修語不可解似當以監本爲是屬國悍爲將屯將軍句下引徐廣曰姓徐監本

多一悍字孝景本紀封故御史大夫周苛孫平爲繩侯句下引徐廣
曰一作應監本多一平字武帝紀自太主句下引徐廣曰武帝姑也
監本多太主二字龜策列傳蝟辱於鵲句下引郭璞曰蝟憎其意心
惡之也監本作而心惡之凡此之類當由古注簡質後人以意爲增
益已失其舊至坊本流傳脫誤尤甚如夏本紀澧水所同句下引孔
安國曰澧水所同同於渭也坊本闕一同字項羽本紀乃封項伯爲
射陽侯句下脫徐廣曰項伯名纏字伯九字是又出監本下矣惟貨
殖傳夔麴鹽豉千瓠句下監本引孫叔敖云瓠瓦器受斗六升合爲
瓠音貽當是孫叔然之訛此本亦復相同是校讎亦不免有疎然終勝
明人監本也

史記索隱唐司馬貞撰貞初受史記於崇文館學士張嘉會病褚少
孫補司馬遷書多傷躋駁又裴駟集解舊有音義年遠散佚諸家音
義延篤音隱鄒誕生柳顧言等書亦失傳而劉伯莊許子儒等又多

疎漏乃因裴駟集解撰爲此書首注駟序一篇載其全文其注司馬遷書則如陸德明經典釋文之例惟標所注之字蓋經傳別行之古法凡二十八卷末二卷爲述贊一百三十篇及補史記條例欲降秦本紀項羽本紀爲系家而呂后孝惠各爲本紀補曹許邾吳芮吳濞淮南系家而降陳涉於列傳蕭何曹參張良周勃五宗三王各爲一傳而附國僑羊舌肸於管晏附尹喜莊周於老子附韓非於商鞅附魯仲連於田單附宋玉於屈原附鄒陽枚乘於賈生又謂司馬相如汲鄭傳不宜在西南夷後大宛傳不合在游俠酷吏之閒欲更其次第其言皆有條理至謂司馬遷述贊不安而別爲之則未喻言外之旨終以三皇本紀自爲之註亦未合闕疑傳信之意也此書本於史記之外別行及明代刊刻監本合裴駟張守節及此書散入句下恣意刪削如高祖本紀母媪母温之辨有關考證者乃以其有異舊說除去不載又如燕世家啓攻益事貞註曰經傳無聞未知其由雖失

於考據竹書

案今本竹書不載此事此據晉書束皙傳所引

亦當存其原文乃以為冗句亦

刪汰之此類不一漏略殊甚然至今沿為定本與成祖所刊朱子周

易本義人人明知其非而積重不可復返此單行之本為北宋祕省

刊板毛晉得而重刻者錄而存之猶可以見司馬氏之舊而正明人

之疎舛焉

史記正義唐張守節撰是書據自序三十卷晁公武陳振孫二家所

錄則作二十卷蓋其標字列注亦必如索隱後人散入句下已非其

舊至明代監本採附集解索隱之後更多所刪節失其本旨如守節

所長在於地理故自序曰郡國城邑委曲詳明而監本於周本紀子

帶立為王句下脫左傳云周與鄭人蘇忿生十二邑温其一也十七

字秦本紀反秦於淮南句下脫楚淮北之地盡入於秦九字項羽本

紀項王自立為西楚霸王句下脫孟康云舊名江陵為南楚吳為東

楚彭城為西楚十九字呂后本紀呂平為扶柳侯句下脫漢扶柳縣

也有澤七字孝景本紀遂西圍梁句下脫梁孝王都睢陽今宋州九
字立楚元王子平陸侯句下脫應劭云平陸西河縣八字孝武本紀
見五時句下脫或曰在雍州雍縣南孟康曰時者神靈上帝也十八
字晉世家是爲晉侯句下脫其城南半入州城中削爲坊城牆北半
見在十七字趙世家吾國東有河薄洛之水句下脫案安平縣屬定
州也八字餓死沙邱宮句下脫括地志云趙武靈王墓在蔚州靈邱
縣東三十里應說是也二十三字韓世家得封於韓原句下脫古今
地名云韓武子食采於韓原故城也十六字淮陰侯列傳家在伊盧
句下脫韋昭及括地志皆說之也十字貨殖列傳殷人都河西句下
脫盤庚都殷墟地屬河西也十字周人都河南句下脫周自平王以
後都洛陽九字自序扈困鄱句下脫漢末陳蕃子逸爲魯相改音皮
田襄魯記曰靈帝末汝南陳子游爲魯相陳蕃子也國人爲諱而改
焉三十九字又如秦本紀樛里疾相韓句下此本作福昌縣東十四

里監本脫十四里三字貨殖傳夫燕亦勃碣之閒句下此本作碣石
 渤海在西北監本脫北字又守節徵引故實頗為賅博故自序曰古
 典幽微竊探其美而監本夏本紀皋陶作士句下脫士若大理卿也
 六字於是夔行樂句下脫若今太常卿也六字周本紀作擊命句下
 脫應劭云太僕周穆王所置蓋大御衆僕之長中大夫也二十一字
 以應為太后養地句下脫太后秦昭之母宣太后芈氏十一字秦始
 皇本紀為我遺鎬池君句下脫張晏云武王居鎬鎬池君則武王也
 伐商故神云始皇荒淫若紂矣今武王可伐矣三十二字敘論孝明
 皇帝句下脫班固典引云後漢明帝永平十七年詔問班固太史遷
 贊語中寧有非耶班固上表陳秦過失及賈誼言奏之四十二字項
 羽本紀會稽守句下脫守音符景帝中二年七月更郡守為太守十
 六字孝景本紀伐馳道樹殖蘭池句下脫案馳道天子道秦始皇作
 之丈而樹十四字孝武本紀是時上求神君句下脫漢武帝故事云

起柏梁臺以處神君長陵女子也先是嫁爲人妻生一男數歲死女子悼痛之歲中亦死而靈宛若祠之遂聞言宛若爲主民人多往請福說家人小事有驗平原君亦祠之至後子孫尊貴及上卽位太后延於宮中祭之聞其言不見其人至是神君求出爲營柏梁臺舍之初霍去病微時自禱神君及見其形自修飾欲與去病交接去病不肖謂神君曰吾以神君清潔故齋戒祈福今欲媵此非也自絕不復往神君慙之乃去也一百七十字見安期生句下脫列仙傳云安期生瑯琊阜鄉亭人也賣藥海邊秦始皇請語三夜賜金數千萬出於阜鄉亭皆置去留書以赤玉舄一量爲報曰後千歲求我於蓬萊山下五十九字李少君病死句下脫漢書起居注云李少君將去武帝夢與共登嵩高山半道有使乘龍時從雲中云太一請少君帝謂左右將舍我去矣數月而少君病死又發棺看惟衣冠在也六十一字史寬舒受其方向下脫姓史名寬舒五字禮書疏房牀第句下脫疏

謂窗也四字律書其於十二支爲丑句下脫徐廣曰此中闕不說大呂及丑也案此下闕文或一本云丑者紐也言陽氣在上未降萬物厄紐未敢出也四十一字天官書氏爲天根句下脫星經云氏四星爲露寢聽朝所居其占明大則臣下奉度合誠圖云氏爲宿宮也三十一字其內五星五帝坐句下脫羣下從謀也五字楚世家伐申過鄧句下脫服虔云鄧曼姓也七字趙世家事有所止句下脫爲人君止於仁爲人臣止於敬爲人子止於孝爲人父止於慈與國人交止於信三十一字封廉頗爲信平君句下脫言篤信而平和也七字韓世家公何不爲韓求質於楚句下脫質子蠨蝨四字又脫公叔嬰知秦楚不以蠨蝨爲事必以韓合於秦楚王聽入質子於韓二十六字又脫次下云知秦楚不以蠨蝨爲事重明脫不字十七字田叔列傳相常從入苑中句下脫堵牆也三字田蚡列傳其春武安侯病句下脫然夫子作春秋依夏正九字衛將軍列傳平陽人也句下脫漢書

云其父鄭季河東平陽人以縣吏給事平陽侯之家也二十三字至
守節於六書五音至爲詳審故書首有論字例論音例二條而監本
於周本紀懼太子釗之不任句下脫釗音招又吉堯反任而針反十
一字秦始皇本紀彗星復見句下脫復扶富反見行見反八字以發
縣卒句下脫子忽反下同五字佐弋竭句下脫弋音翊三字二十人
皆梟首句下脫梟古堯反懸首於木上曰梟十一字體解軻以徇句
下脫紅賣反三字東收遼東而王之句下脫王子放反四字故歸其
質子句下脫質音致三字衣服旌旄節旗句下脫旌音精旄音毛旗
音其九字祇誦功德句下脫祇音脂三字赭其山句下脫赭音者三
字僕射周青臣句下脫音夜二字上樂以刑殺爲威句下脫五孝反
三字二世紀以安邊竟句下脫音境二字敘論爲君討賊句下脫于
僞反三字項羽本紀將秦軍爲前行句下脫胡郎反三字高祖本紀
時時冠之正義音館句下脫下同二字孝景紀天下又安句下脫又

音魚廢反五字龍顛拔墮句下脫徒果反三字攀龍胡顛號句下脫
戶高反下同五字爲且用事泰山句下脫爲于僞反將爲封禪也九
字鄭世家段出奔鄆句下脫音偃二字田叔列傳喜游諸公句下脫
喜許記反諸公謂丈人行也十一字其他一兩字之出入殆千有餘
條尤不可毛舉苟非震澤王氏刊本具存無由知監本之妄刪也

〔卷目〕(一至十二)本紀(十三至二十二)年表(二十三至三十八)
書(三十九至六十)世家(六十一至一百二十)列傳

漢書 一百二十卷

〔著者小傳〕班固後漢安陸人彪子字孟堅九歲能屬文及長博貫
載籍明帝奇之以爲郎典校祕書續父所著漢書積思二十餘年至
建初中乃成當世甚重其書後遷玄武司馬帝會諸儒講論五經作
白虎通德論令固撰集其事竇憲出征匈奴以固爲中護軍行中郎
將事憲敗洛陽令种兢捕繫固死獄中 顏師古唐萬年人之推孫

字籀少博覽精訓詁學善屬文嘗受詔於祕書省考定五經文字多所釐正又譔定五禮爲太子承乾注漢書時謂顏祕書爲孟堅忠臣與所注急就章俱大顯於時卒諡戴永徽中其子表上所著匡謬正俗八篇考據極爲精密

〔四庫提要〕漢班固撰其妹班昭續成之始末具後漢書本傳是書歷代寶傳咸無異論惟南史劉之遴傳云鄱陽嗣王範得班固所撰漢書真本獻東宮皇太子令之遴與張纘到漑陸襄等參校異同之遴錄其異狀數十事以今考之則語皆謬妄據之遴云古本漢書稱永平十年五月二十日己酉郎班固上而今本無上書年月日子案固自永平受詔修漢書至建初中乃成又班昭傳云八表并天文志未竟而卒和帝詔昭就東觀藏書踵成之是此書之次第續成事隔兩朝撰非一手之遴所見古本既有紀表志傳乃云總於永平中表上殆不考成書之年月也之遴又云古本敘傳號爲中篇今本爲敘

傳又今本敘傳載班彪事行而古本云彪自有傳夫古書敘皆載於卷末固自述作書之意故謂之敘追溯祖父之事迹故謂之傳後代史家皆沿其例之遴謂原作中篇文繫篇末中字竟何義也至云彪自有傳語尤荒誕彪在光武之世舉茂才爲徐令以病去官後數應三公之召實爲東漢之人惟附於敘傳故可於沉伯旂穉之後詳其生平若自爲一傳列於西漢則斷限之謂何奚不考敘傳所云起元高祖終於孝平王莽之誅乎之遴又云今本紀及表志列傳不相合爲次而古本相合爲次總成三十八卷案固自言紀表志傳凡百篇篇卽卷也是不爲三十八卷之明證又言述紀十二述表八述志十述列傳七十是各爲次第之明證且隋志作一百十五卷今本作一百二十卷皆以卷帙太重故析爲子卷今本紀分一子卷表分二子卷志分八子卷傳分九子卷若併爲三十八卷則卷帙更重古書著之竹帛殆恐不可行也之遴又云今本外戚在西域後古本次帝紀下又今本高五子文三王景

十三王孝武六子宣元六王雜在諸傳中古本諸王悉次外戚下在陳項傳上夫紀表志傳之序固自言之如之遴所述則傳次於紀而表志反在傳後且諸王旣以代相承宜總題諸王傳何以敘傳作高五王傳第八文三王傳第十七景十三王傳第二十三武五子傳第三十三宣元六王傳第五十耶且漢書始改史記之項羽本紀陳勝世家爲列傳自應居列傳之首豈得移在諸王之後其述外戚傳第六十七元后傳第六十八王莽傳第六十九明以王莽之勢成於元后史家微意寓焉若移外戚傳次於本紀是惡知史法哉之遴又引古本述云淮陰毅毅仗劍周章邦之傑子實惟彭英化爲侯王雲起龍驤然今芮尹江湖句有張晏注是晏所見者卽是今本況之遴傳所云獻太子者謂昭明太子也文選載漢書述贊云信惟餓隸布實黥徒越亦狗盜芮尹江湖雲起龍驤化爲侯王與今本同是昭明亦知之遴所謂古本者不足信矣自漢張霸始撰僞經至梁人於漢書

復有僞撰古本然一經考證紕繆顯然顏師古註本冠以指例六條
歷述諸家不及之遶所說蓋當時已灼知其僞李延壽不訊端末遽
載於史亦可云愛奇嗜博茫無裁斷矣固作是書有受金之謗劉知
幾史通尙述之然文心雕龍史傳篇曰徵賄鬻筆之愆公理辨之究
矣是無其事也又有竊據父書之謗然韋賢翟方進元后三傳俱稱
司徒掾班彪曰顏師古注發例於韋賢傳曰漢書諸贊皆固所爲其
有叔皮先論述者固亦顯以示後人而或者謂固竊盜父名觀此可
以免矣是亦無其事也師古注條理精密實爲獨到然唐人多不用
其說故猗覺寮雜記稱師古注漢書魁梧音悟栗姚皆音去聲杜甫
用魁梧栗姚皆作平聲楊巨源詩請問漢家誰第一麒麟閣上識鄼
侯亦不用音贊之說殆貴遠賤近自古而然歟要其疏通證明究不
愧班固功臣之目固不以一二字之出入病其大體矣

〔卷目〕（一上至十二）帝紀（十三至二十）表（二十一上至三十）志

(三十一至九十九下)列傳(一百上)(一百下)敘傳

後漢書 一百二十一卷

〔著者小傳〕范曄南朝宋南陽順陽人泰子字蔚宗博涉經史善屬文能隸書曉音律始爲尙書吏部郎左遷宣城太守不得志乃刪衆家後漢書成一家之作嘗自言所作漢書雜傳論皆有精意深旨至於循吏以下及六夷諸論筆勢縱橫實天下之奇作時以爲寶錄嗣與魯國孔熙先謀逆伏誅 李賢唐高宗六子字明允上元初皇太子卒遂立賢爲太子俄詔監國處決明審又詔集諸儒共注後漢書時明崇儼以左道爲武后所信調露中帝在中都崇儼爲盜所殺后疑出賢謀遣人發太子陰事廢爲庶人及后得政迫令自殺睿宗立追贈皇太子謚章懷 司馬彪晉人字紹統少篤學不倦然好色薄行爲父所責故不得爲嗣彪由是不交人事而專精學習遂博覽羣籍終其綴集之務泰始中爲祕書丞注莊子作九州春秋續漢書

劉昭梁高唐人字宣卿幼清警通老莊義及長勤學善屬文爲剡令
卒官有幼童傳文集後漢書集注

〔四庫提要〕後漢書本紀十卷列傳八十卷宋范蔚宗撰唐章懷太
子賢注蔚宗事蹟具宋書本傳賢事蹟具唐書本傳考隋志載范書
九十七卷新舊唐書則作九十二卷互有不同惟宋志作九十卷與
今本合然此書歷代相傳無所亡佚考舊唐志又載章懷太子注後
漢書一百卷今本九十卷中分子卷者凡十是章懷作注之時始併
爲九十卷以就成數唐志析其子卷數之故云一百宋志合其子卷
數之故仍九十其實一也又隋唐志均別有蔚宗後漢書論贊五卷
宋志始不著錄疑唐以前論贊與本書別行亦宋人散入書內然史
通論贊篇曰馬遷自序傳後歷寫諸篇各敘其意旣而班固變爲詩
體號之曰述蔚宗改彼述名呼之以贊固之總述合在一篇使其條
貫有序蔚宗後書乃各附本事書於卷末篇目相離斷絕失序夫每

卷立論其煩已多而嗣論以贊爲贖彌甚亦猶文士製碑序終而續以銘曰釋氏演法義盡而宣以偈言云云則唐代范書論贊已綴卷末矣史志別出一目所未詳也范撰是書以志屬謝瞻范敗後瞻悉蠟以覆車遂無傳本今本八志凡三十卷別題梁剡令劉昭注據陳振孫書錄解題乃宋乾興初判國子監孫奭建議校勘以昭所注司馬彪續漢書志與范書合爲一編案隋志載司馬彪續漢書八十三卷唐書亦同宋志惟載劉昭補注後漢志三十卷而彪書不著錄是至宋僅存其志故移以補後漢書之闕其不曰續漢志而曰後漢志是已併入范書之稱矣或謂酈道元水經注嘗引司馬彪州郡志疑其先已別行又謂杜佑通典述科舉之制以後漢書續漢志連類而舉疑唐以前已併入志入范書似未確也自八志合併之後諸書徵引但題後漢書某志儒者或不知爲司馬彪書故何焯義門讀書記曰八志司馬紹統之作

案紹統彪之字也

本漢末諸儒所傳而述於晉初劉

昭注補別有總敘緣諸本或失載劉敘故孫北海藤陰劄記亦誤出
蔚宗志律曆之文云云考洪邁容齋隨筆已誤以八志爲范書則其
誤不自孫承澤始今於此三十卷並題司馬彪名庶以祛流俗之譌
焉

〔卷目〕(一上至九)帝紀(十上)(十下)后紀(十一至四十)志(四
十一至一百二十)列傳

三國志 六十五卷

〔著者小傳〕陳壽晉漢安人字承祚少好學師事同郡譙周仕蜀爲
觀國令史入晉舉孝廉除著作郎終御史治書撰三國志其書以魏
爲正統宋以後人多非之又丁廙丁儀有盛名於魏壽謂其子曰可
覓千斛米見與當爲尊公作佳傳丁不與竟不爲立傳又諸葛亮嘗
髡其父諸葛瞻亦輕壽遂謂亮將略非長無應敵之才言瞻惟工書
名過其實凡此之類均以私廢公褒譏失當有乖直筆又撰古國志

益都耆舊傳 裴松之南朝宋聞喜人字世期博覽墳籍立身簡素
宋國初建召爲太子洗馬累轉中書侍郎文帝使注陳壽三國志松
之鳩集傳記廣增異聞既成奏上帝曰裴世期爲不朽矣使續何承
天國史未及撰述而卒有文論及晉紀

〔四庫提要〕晉陳壽撰宋裴松之注壽事蹟具晉書本傳松之事蹟
具宋書本傳凡魏志三十卷蜀志十五卷吳志二十卷其書以魏爲
正統至習鑿齒作漢晉春秋始立異議自朱子以來無不是鑿齒而
非壽然以理而論壽之謬萬萬無辭以勢而論則鑿齒帝漢順而易
壽欲帝漢逆而難蓋鑿齒時晉已南渡其事有類乎蜀爲偏安者爭
正統此爭於當代之論者也壽則身爲晉武之臣而晉武承魏之統
僞魏是僞晉矣其能行於當代哉此猶宋太祖篡立近於魏而北漢
南唐蹟近於蜀故北宋諸儒皆有所避而不僞魏高宗以後偏安江
左近於蜀而中原魏地全入於金故南宋諸儒乃紛紛起而帝蜀此

皆當論其世未可以一格繩也惟其誤沿史記周秦本紀之例不託始於魏文而託始曹操實不及魏書敘紀之得體是則誠可已不已耳宋元嘉中裴松之受詔爲注所注雜引諸書亦時下己意綜其大致約有六端一曰引諸家之論以辨是非一曰參諸書之說以核譌異一曰傳所有之事詳其委曲一曰傳所無之事補其闕佚一曰傳所有之人詳其生平一曰傳所無之人附以同類其中往往嗜奇愛博頗傷蕪雜如袁紹傳中之胡母班本因爲董卓使紹而見乃注曰班嘗見太山府君及河伯事在搜神記語多不載斯已贅矣鍾繇傳中乃引陸氏異林一條載繇與鬼婦狎昵事蔣濟傳中引列異傳一條載濟子死爲泰山伍伯迎孫阿爲泰山令事此類鑿空語怪凡十餘處悉與本事無關而深於史法有礙殊爲瑕類又其初意似亦欲如應劭之注漢書考究訓詁引證故實故於魏志武帝紀沮授字則注沮音菹獮平字則引續漢書郡國志注獮平縣名屬漁陽甬道字

則引漢書高祖二年與楚戰築甬道贅旒字則引公羊傳先正字則引文侯之命釋位字則引左傳致屆字則引詩綏爰字率俾字昏作字則皆引書糾虔天刑字則引國語至蜀志郤正傳釋誨一篇句句引古事爲注至連數簡又如彭萊傳之革不訓老華佗傳之專本似專秦宓傳之棘草異文少帝紀之叟更異字亦闕有所辨證其他傳文句則不盡然如蜀志廖立傳首忽注其姓曰補救切魏志涼茂傳中忽引博物記注一纏字之類亦闕有之蓋欲爲之而未竟又惜所已成不欲刪棄故或詳或略或有或無亦頗爲例不純然網羅繁富凡六朝舊籍今所不傳者尙一一見其厓略又多首尾完具不似酈道元水經注李善文選注皆翦裁割裂之文故考證之家取材不竭轉相引據者反多於陳壽本書焉

〔卷目〕（一至三十）魏志（三十一至四十五）蜀志（四十六至六十）

五）吳志

晉書

一百三十卷 附音義三卷

珍做宋版印

〔著者小傳〕太宗唐高祖次子名世民年十八首勸高祖起兵初封

趙公進爵秦王高祖平定天下皆帝之功嗣位以後勤於政事郅治

之隆媿美成康貞觀十八年詔房玄齡字喬與褚遂良重撰晉書以許

敬宗等八人分功撰錄李淳風修天文律曆五行三志最可觀太宗

自著宣武二帝陸機王羲之四論於是總題曰御撰凡一百三十卷

貞觀二十三年四月崩年五十三 何超唐東京人字令升撰有晉

書音義三卷

〔四庫提要〕唐房喬等奉敕撰劉知幾史通外篇謂貞觀中詔前後

晉史十八家未能盡善敕史官更加纂撰自是言晉史者皆棄其舊

本競從新撰然唐人如李善注文選徐堅編初學記白居易編六帖

於王隱虞預朱鳳何法盛謝靈運臧榮緒沈約之書與夫徐廣干寶

鄧粲王韶曹嘉之劉謙之之紀孫盛之晉陽秋習鑿齒之漢晉陽秋

檀道鸞之續晉陽秋並見徵引是舊本實未嘗棄毋乃書成之日卽有不愜於衆論者乎考書中惟陸機王羲之兩傳其論皆稱制曰蓋出於太宗之御撰夫典午一朝政事之得失人材之良楛不知凡幾而九重揆藻宣王言以彰特筆者僅一工文之士衡一善書之逸少則全書宗旨大槩可知其所褻貶略實行而獎浮華其所採擇忽正典而取小說波靡不返有自來矣卽如文選注馬汧督誅引臧榮緒王隱書稱馬汧立功孤城死於非罪後加贈祭而晉書不爲立傳亦不附見於周處孟觀等傳又太平御覽引王隱書云武帝欲以郭琦爲佐著作郎問尙書郭彰彰憎琦不附己荅以不識上曰若如卿言烏丸家兒能事卿卽堪郎也及趙王倫篡位又欲用琦琦曰我已爲武帝吏不能復爲今世吏終於家琦蓋始終亮節之士也而晉書亦削而不載其所載者大抵宏獎風流以資談柄取劉義慶世說新語與劉孝標所注一一互勘幾於全部收入是直裨官之體安得目曰

史傳乎黃朝英緗素雜記詆其引世說和嶠峨峨如千丈松礪礪多
節目既載入和嶠傳中又以嶠字相同並載入温嶠傳中顛倒舛迕
竟不及檢猶其枝葉之病非其根本之病也正史之中惟此書及宋
史後人紛紛改撰其亦有由矣特以十八家之書並亡考晉事者舍
此無由故歷代存之不廢耳音義三卷唐何超撰超字令升自稱東
京人楊齊宣爲之序其審音辨字頗有發明舊本所載今仍附見於
末焉

〔卷目〕(一至十)帝紀(十一至三十)志(三十一至一百)列傳(一
百一至一百三十)載記(附音義三卷)

宋書

一百卷

〔著者小傳〕梁沈約武康人字休文篤志好學博通羣籍善屬文仕
宋及齊累官司徒左長史武帝受禪爲尙書僕射遷尙書令卒謚隱
約歷仕三代藏書至二萬卷該悉舊章博物洽聞當世取則著有晉

書宋書齊紀梁武紀邇言謚例宋文章志及文集百卷又撰四聲譜窮其妙旨爲聲韻學上一大發明顧炎武謂約作譜不能上據雅南旁撫騷子以成不刊之典而僅按班張以下諸人之賦曹劉以下諸人之詩所用之音撰爲定本於是今音行而古音亡

〔四庫提要〕梁沈約撰約事蹟具梁書本傳約表上其書謂本紀列傳繕寫已畢合志表七十卷所撰諸志須成續上今此書有紀志傳而無表劉知幾史通謂此書爲紀十志三十列傳六十合百卷不言其有表隋書經籍志亦作宋書一百卷與今本卷數符合或唐以前其表早佚今本卷帙出於後人所編次數以志序考之稱凡損益前史諸志爲八門曰律曆曰禮曰樂曰天文曰五行曰符瑞曰州郡曰百官是律曆未嘗分兩門今本總目題卷十一志第一志序卷十二志第二曆上卷十三志第三曆下而每卷細目作志第一律志序志第二曆上志第三曆下則出於後人編目強爲分割非約原本之舊

次此其明證矣八志之中惟符瑞實爲疣贅州郡惟據太康地志及何承天徐爰原本於僑置郡立併省分析多不詳其年月亦爲疎略至於禮志合郊祀祭祀朝會輿服總爲一門以省支節樂志詳述八音衆器及鼓吹饒歌諸樂章以存義訓如鐸舞曲聖人制禮樂篇有聲而詞不可詳者每一句爲一斷以存其節奏義例尤善若其追述前代晁公武讀書志雖以失於限斷爲譏然班固漢書增載地理上敘九州創設五行演明鴻範推原溯本事有前規且魏晉並皆短祚宋承其後歷時未久多所因仍約詳其沿革之由未爲大失亦未可遽用糾彈也觀徐爰傳述當時修史議爲桓玄等立傳約則謂桓玄盧循等身爲晉賊非關後代吳隱謝混等義止前朝不宜濫入劉毅何無忌等志在興復情非造宋並爲刊除歸之晉籍其申明史例又何嘗不謹嚴乎其書至北宋已多散失崇文總目謂闕趙倫之傳一卷陳振孫書錄解題謂獨闕到彥之傳今本卷四十六有趙倫之王

懿張邵傳惟彥之傳獨闕與陳振孫所見本同卷後有臣穆附記謂此卷體同南史傳末無論疑非約書其言良是蓋宋初已闕此一卷後人雜取高氏小史及南史以補之取盈卷帙然南史有到彥之傳獨舍而不取又張邵傳後附見其兄子暢直用南史之文而不知此書卷五十九已有張暢傳忘其重出則補綴者之疎矣臣穆當卽鄭穆宋史有傳嘉祐中嘗校勘宋書其所考證僅見此條蓋重刊之時削除偶贖亦足見明以來之刊本隨意竄改多非古式云

〔卷目〕(一至十)帝紀(十一至四十)志(四十一至一百)列傳

南齊書 五十九卷

〔著者小傳〕蕭子顯齊高帝孫字景陽封寧都縣侯梁天監初降爲子偉容貌好學工文嘗著鴻序賦尚書令沈約見而稱之累遷吏部尚書加侍中子顯性凝簡負才氣及掌選見九流賓客不與交言但舉扇一搗而已人皆恨之大同間出爲吳興太守卒及葬請諡武帝

手詔恃才傲物宜諡曰驕有後漢書南齊書貴儉傳等書

珍做宋版卸

〔四庫提要〕梁蕭子顯撰子顯事蹟附載梁書蕭子恪傳章俊卿山

堂考索引館閣書目云南齊書本六十卷今存五十九卷亡其一劉
知幾史通曾鞏敘錄則皆云八紀十一志四十列傳合爲五十九卷
不言其有闕佚然梁書及南史子顯本傳實俱作六十卷則館閣書
目不爲無據考南史載子顯自序似是據其敘傳之詞又晁公武讀
書志載其進書表云天文事祕戶口不知不敢私載疑原書六十卷
爲子顯敘傳末附以表與李延壽北史例同至唐已佚其敘傳而其
表至宋猶存今又併其表佚之故較本傳闕一卷也又史通序例篇
謂令升先覺遠述丘明史例中興於是爲盛沈宋之志序蕭齊之序
錄雖以序爲名其實例也子顯雖文傷蹇躓而義甚優長爲序例之
美者今考此書良政高逸孝義倖臣諸傳皆有序而文學傳獨無敘
殆亦宋以後所殘闕歟齊高好用圖讖梁武崇尚釋氏故子顯於高

帝紀卷一引太乙九宮占祥瑞志附會緯書高逸傳論推闡禪理蓋牽於時尚未能釐正又如高帝紀載王蘊之撫刀袁粲之郊飲連綴瑣事殊乖紀體至列傳尤爲冗雜然如紀建元創業諸事載沈攸之書於張敬兒傳述顏靈寶語於王敬則傳直書無隱尙不失是非之公高十二王傳引陳思之表曹罔之論感懷宗國有史家言外之意焉未嘗無可節取也自李延壽之史盛行此書誦習者尠日就譌脫州郡志及桂陽王傳中均有闕文無從補正其餘字句舛誤如謝莊傳南史作詔徙越巖此書作越州崔懷慎傳南史作臣子兩遂此書作兩節者又不可勝乙今裒合諸本參核異同正其灼然可知者其或無考則從闕疑之義焉

〔卷目〕(一至八)本紀(九至十九)志(二十至五十九)列傳

梁書 五十六卷

〔著者小傳〕姚思廉唐武康人本名簡以字行寡嗜慾惟一於學初

仕隋爲代王侍讀高祖定京師府僚皆奔亡獨思廉侍太宗時累官弘文館學士與魏徵同撰梁陳書拜散騎常侍卒諡康

〔四庫提要〕唐姚思廉奉敕撰唐書思廉本傳稱貞觀三年詔思廉

同魏徵撰藝文志亦稱梁書陳書皆魏徵同撰舊本惟題思廉蓋徵

本監修不過參定其論讚

案此據史通古今正史篇魏徵總知其務凡有論讚徵多預焉之文獨標思

廉不沒秉筆之實也是書舊唐書經籍志及思廉本傳俱云五十卷

新唐書作五十六卷考劉知幾史通謂姚察有志撰勒施功未周其

子思廉憑其舊稿加以新錄述爲梁書五十六卷則新唐書所據爲

思廉編目之舊舊唐書誤脫六字審矣思廉本推其父意以成書每

卷之後題陳吏部尚書姚察者二十五篇題史官陳吏部尚書姚察

者一篇蓋仿漢書卷後題班彪之例其專稱史官者殆思廉所續纂

歟思廉承藉家學旣素有淵源又貞觀二年先已編纂及詔入祕書

省論撰之後又越七年其用力亦云勤篤中如簡文紀載大寶二年

四月丙子侯景襲郢州執刺史蕭方諸而元帝紀作閏四月丙午則兩卷之內月日參差侯景傳上云張彪起義下云彪寇錢塘則數行之閒書法乖舛趙與昔賓退錄議其於江革傳中則稱何敬容掌選序用多非其人於敬容傳中則稱其銓序明審號爲稱職尤是非矛盾其餘事蹟之複互者前後錯見證以南史亦往往牴牾蓋著書若是之難也然持論多平允排整次第猶具漢晉以來相傳之史法要異乎取成衆手編次失倫者矣

〔卷目〕(一至六)本紀(七至五十六)列傳

陳書 三十六卷

〔著者小傳〕姚思廉(見前)

〔四庫提要〕唐姚思廉奉敕撰劉知幾史通謂貞觀初思廉奉詔撰成二史彌歷九載方始畢功而曾鞏校上序謂姚察錄梁陳之事其書未就屬子思廉繼其業武德五年思廉受詔爲陳書貞觀三年論

撰於祕書內省十年正月壬子始上之是思廉編輯之功固不止於九載矣知幾又謂陳史初有顧野王傅縡各爲撰史學士太建初中書郎陸瓊續撰諸篇姚察就加刪改是察之修史實兼採三家考隋書經籍志有顧野王陳書三卷傅縡陳書三卷陸瓊陳書四十二卷殆卽察所據之本而思廉爲傅縡陸瓊傳詳述撰著獨不言其修史篇第殊爲疎略至顧野王傳稱其撰國史紀傳二百卷與隋志卷帙不符則疑隋志舛譌思廉所記得其真也察傳見二十七卷載其撰梁陳二史事甚詳是書爲奉詔所修不同私撰故不用序傳之例無庸以變古爲嫌惟察陳亡入隋爲祕書丞北絳郡開國公與同時江總袁憲諸人並稽首新朝歷踐華秩而仍列傳於陳書揆以史例失限斷矣且江總何人乃取與其父合傳尤屬自污觀李商隱贈杜牧詩有前身應是梁江總句乃借以相譽豈總之爲人唐時尚未論定耶書中惟二卷三卷題陳吏部尙書姚察他卷則俱稱史臣蓋察先

纂梁書此書僅成二卷其餘皆思廉所補撰今讀其列傳體例秩然出於一手不似梁書之參差亦以此也惟其中紀傳年月閒有牴牾不能不謂之疵累然諸史皆然亦不能獨責此書矣

〔卷目〕（一至六）本紀（七至三十六）列傳

魏書 一百十四卷

〔著者小傳〕魏收北齊鉅鹿人字伯起小字助佛機警能文與溫子昇邢邵齊名號北朝三才子收天才煥發在二子之右以文才顯然性褊見當途貴游每以顏色相悅初在洛京輕薄尤甚人號驚蛟蝶著有魏書

〔四庫提要〕北齊魏收奉敕撰收表上其書凡十二紀九十二列傳分爲一百三十卷今所行本爲宋劉恕范祖禹等所校定恕等序錄謂隋魏澹更撰後魏書九十二卷唐又有張太素後魏書一百卷今皆不傳魏史惟以魏收書爲主校其亡逸不完者二十九篇各疏於

逐篇之末然其據何書以補闕則恕等未言崇文總目謂澹書纔存

紀一卷太素書存志二卷陳振孫書錄解題引中興書目謂收書闕

太宗紀以魏澹書補之志闕天象二卷以張太素書補之又謂澹太

素之書既亡惟此紀志獨存不知何據是振孫亦疑未能定也今考

太平御覽皇王部所載後魏書帝紀多取魏收書而芟其字句重複

太宗紀亦與今本首尾符合其中轉增多數語永興四年宴羣臣於西宮使各獻直言下

多弗育所諱四字泰常八年廣西宮起外牆垣周回二十里下多是歲民饑詔所在開倉賑給十一字按此數語北史有之然北史前後

之文與御覽所引者絕異夫御覽引諸史之文有刪無增而此紀獨異其為收書

之原本歟抑補綴者取魏澹書而閒有節損歟然御覽所引後魏書

實不專取一家如此書卷十二孝靜帝紀亡後人所補而御覽所載

孝靜紀與此書體例絕殊又有西魏孝武紀文帝紀廢帝紀恭帝紀

則疑其取諸魏澹書隋書魏澹傳自道武下及恭帝為十二紀劉又知幾史通云澹以西魏為真故文帝稱紀

此書卷十三皇后傳亡亦後人所補今以御覽相校則字句多同惟

中有刪節而未附西魏五后當亦取澹書以足成之蓋澹書至宋初

尚不止僅存一卷故爲補綴者所取資至澹書亦闕始取北史以補

之如崔或蔣少游及西域傳故崇文總目謂魏澹魏史李延壽北史與收史相亂

卷第殊舛是宋初已不能辨定矣惟所補天象志二卷爲唐太宗避

諱可信爲唐人之書無疑義耳收以是書爲世所詬厲號爲穢史今

以收傳考之如云收受爾朱榮子金故減其惡其實榮之凶悖收未

嘗不書於冊至論中所云若修德義之風則韓彭伊霍夫何足數反

言見意正史家之微詞指以虛褒似未達其文義又云楊愔高德正

勢傾朝野收遂爲其家作傳其預修國史得陽休之之助因爲休之

父固作佳傳案愔之先世爲楊椿楊津德正之先世爲高允高祐椿

津之孝友亮節允之名德祐之好學實爲魏代聞人寧能以其門祚

方昌遂引嫌不錄況北史陽固傳稱固以譏切聚斂爲王顯所嫉因

奏固剩請米麥免固官從征碭石李平奇固勇敢軍中大事悉與謀

之不云固以貪虐先爲李平所彈也李延壽書作於唐代豈亦媚陽
休之乎又云盧同位至儀同功業顯著不爲立傳崔綽位止功曹本
無事蹟乃爲首傳夫盧同希元義之旨多所誅戮後以義黨罷官不
得云功業顯著綽以卑秩見重於高允稱其道德固當爲傳獨行者
所不遺觀盧文訴辭徒以父位儀同綽僅功曹較量官秩之崇卑爭

專傳附傳之榮辱

魏書初定本盧同附見盧元傳崔綽自有傳後奉敕更審同立專傳綽改入附傳

是亦未

足服收也蓋收恃才輕薄有驚蛟蝶之稱其德望本不足以服衆又

魏齊世近著名史籍者並有子孫孰不欲顯榮其祖父旣不能一一

如志遂譁然羣起而攻平心而論人非南董豈信其一字無私但互

考諸書證其所著亦未甚遠於是非穢史之說無乃已甚之詞乎李

延壽修北史多見館中墜簡參核異同每以收書爲據其爲收傳論

云勒成魏籍婉而有章繁而不蕪志存實錄其必有所見矣今魏澹

等之書俱佚而收書終列於正史殆亦恩怨併盡而後是非乃明歟

收敘事詳贍而條例未密多爲魏澹所駁正北史不取澹書而澹傳存其敘例絕不爲掩其所短則公論也

〔卷目〕(一至十二)帝紀(十三至一百四)列傳(一百五至一百一十四)志

北齊書 五十卷

〔著者小傳〕李百藥唐安平人字重規初仕隋後歸唐高宗時累官宗正卿晉子爵嘗侍父母喪還鄉徒跣數千里服雖除容貌癯瘠者累年性疎脫喜劇飲翰藻沈鬱尤長於詩樵廝皆能諷之卒謚康輯有北齊書

〔四庫提要〕唐李百藥奉敕撰蓋承其父德林之業纂緝成書猶姚思廉之繼姚察也大致仿後漢書之體卷後各繫論贊然其書自北宋以後漸就散佚故晁公武讀書志已稱殘闕不完今所行本蓋後人取北史以補亡非舊帙矣今核其書本紀則文襄紀齊集冗雜文

宣紀孝昭紀論辭重複列傳則九卷十卷十一卷十四卷十五卷二十六卷二十七卷二十九卷至四十卷俱無論贊二十八卷有贊無論十二卷四十六卷四十七卷四十八卷四十九卷有論無贊又史通引李百藥齊書論魏收云若使子孫有靈竊恐未挹高論又云足以入相如之室游尼父之門志存實錄詆訐私今魏收傳無此語皆掇拾者有所未及也至如庫狄干傳之連及其子士文元斌傳之稱齊文襄則又掇拾者刊削未盡之辭矣北齊立國本淺文宣以後綱紀廢弛兵事倣擾既不及後魏之整飭疆圉復不及後周之修明法制其倚任爲國者亦鮮始終貞亮之士均無奇功偉節資史筆之發揮觀儒林文苑傳敘去其已見魏書及見周書者寥寥數人聊以取盈卷帙是其文章萎茶節目叢脛固由於史材史學不及古人要亦其時爲之也然一代興亡當有專史典章之沿革政事之得失人材之優劣於是乎有徵焉未始非後來之鑒也

〔卷目〕(一至八)本紀(九至五十)列傳

周書 五十卷

〔著者小傳〕令狐德棻唐燉煌人世居華原博涉文史早歲知名高

祖時爲秘書丞時經籍散逸德棻奏請購募遺書數年間羣書略備

貞觀中修梁陳周齊隋五史其議亦自德棻發之德棻自領周書高

宗朝官弘文館學士累遷國子祭酒國家凡有修撰無不參預暮年

著述尤勤卒諡憲

〔四庫提要〕唐令狐德棻等奉敕撰貞觀中修梁陳周齊隋五史其

議自德棻發之而德棻專領周書與岑文本崔仁師陳叔達唐儉同

修晁公武讀書志稱宋仁宗時出太清樓本合史館祕閣本又募天

下書而取夏竦李巽家本下館閣是正其文字其後林希王安國上

之是北宋重校尙不云有所散佚今考其書則殘闕殊甚多取北史

以補亡又多有所竄亂而皆不標其所移掇者何卷所削改者何篇

遂與德棻原書混淆莫辨今案其文義粗尋梗槩則二十五卷二十六卷三十一卷三十二卷三十三卷俱傳後無論其傳文多同北史惟更易北史之稱周文者爲太祖韋孝寬傳連書周文周孝閔帝則更易尙有未盡至王慶傳連書大象元年開皇元年不言其自周入隋尤剽取北史之顯證矣又如韋孝寬傳末刪北史兄夔二字則韋夔傳中所云與孝寬並馬者事無根源盧辯傳中刪去其曾事節閔帝事則傳中所云及帝入關者語不可曉是皆率意刊削遂成疎漏至於遺文脫簡前後疊出又不能悉爲補綴蓋名爲德棻之書實不盡出德棻且名爲移掇李延壽之書亦不盡出延壽特大體未改而已劉知幾史通曰今俗所行周史是令狐德棻等所撰其書文而不實雅而不檢真迹甚寡客氣尤繁尋宇文開國之初事由蘇綽軍國詞令皆準尙書太祖敕朝廷他文悉準於此蓋史臣所記皆稟其規柳虬之徒從風而靡案綽文雖去彼淫麗存茲典實而陷於矯枉過

正之失乖乎適俗隨時之義苟記言若是則其謬愈多爰及牛宏彌
尚儒雅卽其舊事因而勒成務累清言罕逢佳句而令狐不能別求
他述用廣異聞惟憑本書重加潤色遂使周氏一代之史多非實錄
又議其以王劭蔡允恭蕭韶蕭大圜裴政杜臺卿之書中有俚言故
致遺略其詆譏德棻甚力然文質因時紀載從實周代旣文章爾雅
仿古製言載筆者勢不能易彼妍辭改從俚語至於敵國詆謗里巷
諺謠削而不書史之正體豈能用是爲譏議哉況德棻旁徵簡牘意
在撫實故元偉傳後於元氏戚屬事迹湮沒者猶考其名位連綴附
書固不可槩斥爲疎略庾信傳論仿宋書謝靈運傳之體推論六義
源流於信獨致微辭良以當時儷偶相高故有意於矯時之弊亦可
見其不尚尙虛辭矣知幾所云非篤論也晁公武讀書志祖述其語
掩爲己說聽聲之見尤無取焉

〔卷目〕（一至八）本紀（九至五十）列傳

隋書 八十五卷

珍做宋版印

〔著者小傳〕魏徵唐曲城人字玄成好讀書多所通涉隋亂詭為道士初從李密入京見高祖自請安輯山東乃擢祕書丞太宗時拜諫議大夫檢校侍中令狐德棻孔穎達等撰周隋各史徵總加撰定多所損益時稱良史

〔四庫提要〕唐魏徵等奉敕撰貞觀三年詔徵等修隋史十年成紀

傳五十五卷十五年又詔修梁陳齊周隋五代史志顯慶元年長孫

無忌上進據劉知幾史通所載撰紀傳者為顏師古孔穎達案集古錄據穎

達墓碑謂碑稱與魏鄭公同修隋書而傳不著蓋但據舊唐書言之未考知幾書也撰志者為于志寧李淳風

韋安仁李延壽令狐德棻案宋刻隋書之後有天聖中校正舊跋稱

同修紀傳者尚有許敬宗同修志者尚有敬播至每卷分題舊本十

志內惟經籍志題侍中鄭國公魏徵撰五行志序或云褚遂良作紀

傳亦有題太子少師許敬宗撰者今從眾本所載紀傳題以徵志題

以無忌云云是此書每卷所題撰人姓名在宋代已不能畫一至天
聖中重刊始定以領修者爲主分題徵及無忌也其紀傳不出一手
閒有異同如文帝本紀云善相者趙昭而藝術傳則作來和又本紀
云以賀若弼爲楚州總管而弼本傳則作吳州蓋卷帙浩繁牴牾在
所不免至顧炎武日知錄所摘突厥傳中上言沙鉢略可汗擊阿波
破擒之下言雍虞閩以隋所賜旗鼓西征阿波敵人以爲隋兵所助
多來降附遂生擒阿波一條則疑上文本言擊阿波破之傳寫誤衍
一擒字炎武以爲一事重書似未必然也其十志最爲後人所推而
或疑其失於限斷考史通古今正史篇稱太宗以梁陳及齊周隋氏
並未有書乃命學士分修仍以祕書監魏徵總知其務始以貞觀三
年創造至十八年方就合爲五代紀傳併目錄凡二百五十二卷書
成下於史閣惟有十志斷爲三十卷尋擬續奏未有其文太宗崩後
刊勒始成其篇第編入隋書其實別行俗呼爲五代史志云云是當

時梁陳齊周隋五代史本連爲一書十志卽爲五史而作故亦通括
五代其編入隋書特以隋於五史居末非專屬隋也後來五史各行
十志遂專稱隋志實非其舊乃議其兼載前代是全不核始末矣惟
其時晉書已成而律曆志所載備數和聲審度嘉量衡權五篇天文
志所載地中晷影漏刻經星中宮二十八舍十輝諸篇皆上溯魏晉
與晉志複出殊非史體且同出李淳風一人之手亦不應自勦己說
殆以晉書不在五史之數故不相避歟五行志體例與律曆天文三
志頗殊不類淳風手作疑宋時舊本題褚遂良撰者未必無所受之
地理志詳載山川以定疆域百官志辨明品秩以別差等能補蕭子
顯魏收所未備惟經籍志編次無法述經學源流每多舛誤如以尙
書二十八篇爲伏生口傳而不知伏生自有書教齊魯闕以詩序爲
衛宏所潤益而不知傳自毛亨以小戴禮記有月令明堂位樂記三
篇爲馬融所增益而不知劉向別錄禮記已載此三篇在十志中爲

最下然後漢以後之藝文惟藉是以考見源流辨別真偽亦不以小疵爲病矣

〔卷目〕(一至五)帝紀(六至三十五)志(三十六至八十五)列傳

南史 八十卷

〔著者小傳〕李延壽唐相州人字遐齡官御史臺主簿直國史遷符璽郎作南北史一百八十篇刪繁補闕過本史遠甚又撰太宗政典高宗賜帛褒之

〔四庫提要〕唐李延壽撰延壽事蹟附載新唐書令狐德棻傳延壽承其父大師之志爲北史南史而南史先成就正於令狐德棻其乖失者嘗爲改定宋人稱延壽之書刪煩補闕爲近世佳史顧炎武日知錄又摘其李安民諸傳一事兩見爲記載之疎以今考之本紀刪其連綴諸臣事蹟列傳則多刪詞賦意存簡要殊勝本書然宋齊梁陳四朝九錫之文符命之說告天之詞皆沿襲虛言無關實證而備

書簡牘陳陳相因是芟削未盡也且合累朝之書勒爲通史發凡起例宜歸畫一今延壽於循吏儒林隱逸傳旣遞載四朝人物而文學一傳乃因宋書不立此目遂始於齊之邱靈鞠豈宋無文學乎孝義傳搜綴湮落以備闕文而蕭矯妻羊氏衛敬瑜妻王氏先後互載男女無別將謂史不當有列女傳乎況北史謂周書無文苑傳遂取列傳中之庾信王褒入於文苑則宋之謝靈運顏延之何承天裴松之諸人何難移冠文苑之前北史謂魏隋有列女傳齊周並無此篇今又得趙氏陳氏附備列女則宛陵女子等十四人何難取補列女之闕書成一手而例出兩岐尤以矛盾萬萬無以自解者矣蓋延壽當日專致力於北史南史不過因其舊文排纂刪潤故其減字節句每失本意閒有所增益又緣飾爲多如宋路太后傳較宋書爲詳然沈約修史工於詆毀前朝而不載路太后飲酒置毒之事當亦揆以前後恩慈不應存此異說也延壽採雜史爲實錄又豈可盡信哉然

自宋略齊春秋梁典諸書盡亡其備宋齊梁陳四史之參校者獨賴此書之存則亦何可盡廢也

〔卷目〕(一至十)本紀(十一至八十)列傳

北史 一百卷

〔著者小傳〕李延壽(見前)

〔四庫提要〕唐李延壽撰延壽表進其書稱本紀十二卷列傳八十卷爲北史與今本卷數符合文獻通考作八十卷者誤也延壽既與修隋書十志又世居北土見聞較近參覈同異於北史用力獨深故敘事詳密首尾典贍如載元韶之姦利彭樂之勇敢郭琬沓龍超諸人之節義皆具見特筆出酈道元於酷吏附陸法和於藝術離合編次亦深有別裁視南史之多仍舊本者迥如兩手惟其以姓爲類分卷無法南史以王謝分支北史亦以崔盧繫派故家世族一例連書覽其姓名則同爲父子稽其朝代則各有君臣參錯混淆殆難辨

別甚至長孫儉附長孫嵩傳薛道衡附薛辨傳遙遙華胄下逮雲仍
隔越抑又甚矣考延壽之敘次列傳先以魏宗室諸王次以魏臣又
次以齊宗室及齊臣下逮周隋莫不皆然凡以勒一朝始末限斷分
明乃獨於一二高門自亂其例深所未安至於楊素父子有關隋室
興亡以其系出弘農遂附見魏臣楊敷傳後又魏收及魏長賢諸人
本非父子兄弟以其同爲魏姓遂合爲一卷尤爲舛迥觀延壽敘例
凡累代相承者皆謂之家傳豈知家傳之體不當施於國史哉且南
北史雖曰二書實通爲一家之著述故延壽於裴蘊傳云祖之平父
忌南史有傳王頌傳云父僧辨南史有傳卽互相貫通之旨也乃南
史既有晉熙王昶傳矣北史復有劉昶傳南史既有鄱陽王寶寅傳
矣北史復有蕭寶寅傳南史既有豫章王綜樂良王大圜傳矣北史
復有蕭贊蕭綜入魏改名贊蕭大圜傳朱修之薛安都諸人南史則取諸宋
書北史則取諸魏書不爲刪併殆專意北史無暇追刪南史以致有

此誤乎然自宋以後魏書北齊書周書皆殘闕不全惟此書僅麥鐵杖傳有闕文荀濟傳脫去數行其餘皆卷帙整齊始末完具徵北朝之故實者終以是書爲依據故雖入書具列而二史仍並行焉

〔卷目〕(一至十二)本紀(十三至一百)列傳

舊唐書 一百卷

〔著者小傳〕劉昫後晉歸義人字曜遠神采秀拔文學優贍與兄暉弟皦知名燕薊間唐莊宗以爲翰林學士明宗愛其風韻遷端明殿學士未幾入相時人榮之末帝時監修國史與李愚相詬詆罷爲右僕射天福中爲東都留守開運中拜司空平章事以目疾乞休罷爲太保卒撰有舊唐書

〔四庫提要〕晉劉昫等奉敕撰五代史記昫本傳不言昫撰此書史漏略也自宋嘉祐後歐陽修宋祁等重撰新書此書遂廢然其本流傳不絕儒者表昫等之長以攻修祁等之短者亦不絕今觀所述大

抵長慶以前本紀惟書大事簡而有體列傳敘述詳明瞻而不穢頗

能存班范之舊法長慶以後本紀則詩話書序婚狀獄詞委悉具書

語多支蔓如文宗紀云上每誦杜甫曲江行云江頭宮殿鏤千門細柳新蒲為誰綠乃知天寶以前曲江四岸皆有行宮臺殿

百司靡署又云戶部侍郎判度支王彥威進所撰供軍圖略其序云云武宗紀云右庶子呂讓進狀亡兄温女太和七年嫁左衛兵曹蕭

敏生二男開成三年敏心疾乖忤因而離婚今敏日愈却乞與臣姪女配合又云御史臺奏據三司推勘吳湘獄謹具逐人罪狀如後揚

州都虞候盧行立劉羣於會昌二年五月十四日於阿顏家喫酒云云列傳則多敘官資曾無事實或

但載寵遇不具首尾如夏侯孜傳祇載歷官所至及責讓詔詞不及一事朱朴傳祇載其相昭宗而不及其始末

所謂繁略不均者誠如宋人之所譏案崇文總目初吳兢撰唐史自

勅業訖於開元凡一百一十卷韋述因兢舊本更加筆削刊去酷吏

傳為紀志列傳一百十二卷至德乾元以後史官于休烈又增肅宗

紀二卷史官令狐峒等復於紀志傳隨篇增輯而不加卷帙為唐書

一百三十卷是唐書舊稿實出吳兢雖眾手續增規模未改昫等用

為藍本故具有典型觀順宗紀論題史臣韓愈憲宗紀論題史臣蔣

係此因仍前史之明證也至長慶以後史失其官無復善本昉等自採雜說傳記排纂成之動乖體例良有由矣至於卷一百三十二既有楊朝晟傳卷一百四十四復爲立傳蕭穎士既附見於卷一百二復見於卷一百九十文苑傳宇文韶諫獵表既見於卷六十二復見於卷六十四蔣乂諫張茂宗尙主疏既見於卷一百四十一復見於卷一百四十九輿服志所載條議亦多同列傳之文蓋李崧賈緯諸人各自編排不相參校昉掌領修之任曾未能鉤稽本末使首尾貫通舛漏之譏亦無以自解平心而論蓋瑕瑜不掩之作黨新書者必謂事事勝舊書黨舊書者又必謂事事勝新書皆偏見也我皇上獨秉睿裁定於正史之中二書並列相輔而行誠千古至公之道論史諸家可無庸復置一議矣

〔卷目〕（一至二十）本紀（二十一至五十）志（五十一至一百五十）

列傳

新唐書 一百二十五卷

珍做宋版印

〔著者小傳〕歐陽修宋廬陵人字永叔自號醉翁舉進士甲科累官至參知政事熙寧初與王安石不合以太子少師致仕修博覽羣書得昌黎遺稿苦心探索遂以文章冠天下晚號六一居士卒諡文忠著有新唐書五代史毛詩本義集古錄歸田錄洛陽牡丹記文忠集試筆居士集六一詩話六一詞 宋祁宋安陸人字子京與兄庠同舉進士累遷龍圖閣學士史館脩撰與歐陽修同脩唐書旋出知亳州自是十餘年間出入內外嘗以史稿自隨唐書成遷左丞進工部尚書逾月拜翰林學士承旨卒諡景文有宋景文集益都方物略筆記

〔四庫提要〕宋歐陽修宋祁等奉敕撰其監修者則曾公亮故書首進表以公亮爲首陳振孫書錄解題曰舊例修書止署官高一人名銜歐公曰宋公於我爲前輩且於此書用力久何可沒也遂於紀傳

各著之宋公感其退遜故書中列傳題祁名本紀志表題修名然考隋書諸志已有此例實不始於修與祁又宋史呂夏卿傳稱宰相世系表夏卿所撰而書中亦題修名則仍以官高者爲主特諸史多用一人此用二人爲異耳是書本以補正劉昫之舛漏自稱事增於前文省於舊劉安世元城語錄則謂事增文省正新書之失而未明其所以然今卽其說而推之史官記錄具載舊書今必欲廣所未備勢必蒐及小說而至於猥雜唐代詞章體皆詳贍今必欲減其文句勢必變爲澀體而至於詰屈安世之言所謂中其病源者也若夫史漢本紀多載詔令古文簡質至多不過數行耳唐代王言率崇縟麗駢四儷六累牘連篇宋敏求所輯唐大詔令多至一百三十卷使盡登本紀天下有是史體乎祁一例刊除事非得已過相訾議未見其然至於呂夏卿私撰兵志見晁氏讀書志宋祁別撰紀志見王得臣塵史則同局且私心不滿書甫頒行吳縝糾謬卽踵之而出其所攻駁

亦未嘗不切中其失然一代史書網羅浩博門分類別端緒紛拏出一手則精力難周出衆手則體裁互異爰從三史以逮八書牴牾參差均所不免不獨此書爲然呂宋之書未知優劣吳縝所糾存備考證則可因是以病新書則一隅之見矣

〔卷目〕(一至十)本紀(十一至六十)志(六十一至七十五)表(七十六至二百二十五)列傳

舊五代史

一百五十卷

〔著者小傳〕薛居正宋浚儀人字子平少好學有大志後唐清泰初登第乾德初官兵部侍郎以本官參知政事監修五代史畢進平章事太平興國初進位司空卒諡文惠居正性孝行純爲相任寬簡不好苛察好讀書爲文落筆不能自休子惟吉集爲三十卷上之賜名

文惠集

〔四庫提要〕宋薛居正等奉敕撰考晁公武讀書志云開寶中詔修

梁唐晉漢周書盧多遜扈蒙張澹李昉劉兼李穆李九齡同修宰相薛居正等監修玉海引中興書目云開寶六年四月戊申詔修五代史七年閏十月甲子書成凡百五十卷目錄二卷爲紀六十一志十二傳七十七多據累朝實錄及范質五代通錄爲稿本其後歐陽修別撰五代史記七十五卷藏於家修沒後官爲刊印學者始不專習薛史然二書猶並行於世至金章宗泰和七年詔學官止用歐陽修史於是薛史遂微元明以來罕有援引其書者傳本亦漸就湮沒惟明內府有之見於文淵閣書目故永樂大典多載其文然割裂淆亂已非居正等篇第之舊恭逢聖朝右文稽古網羅放佚零縑斷簡皆次第編摩 臣等謹就永樂大典各韻中所引薛史甄錄條繫排纂先後檢其篇第尙得十之八九又考宋人書之徵引薛史者每條採錄以補其闕遂得依原本卷數勒成一編晦而復彰散而復聚殆實有神物呵護以待時而出者遭逢之幸洵非偶然也歐陽修文章遠出

居正等上其筆削體例亦特謹嚴然自宋時論二史者卽互有所主
司馬光作通鑑胡三省作通鑑註皆專據薛史而不取歐史沈括洪
邁王應麟輩爲一代博洽之士其所著述於薛歐二史亦多兼採而
未嘗有所軒輊蓋修所作皆刊削舊史之文意主斷制不冝以紀載
叢碎自貶其體故其詞極工而於情事或不能詳備至居正等奉詔
撰述本在宋初其時秉筆之臣尙多逮事五代見聞較近紀傳皆首
尾完具可以徵信故異同所在較核事蹟往往以此書爲證雖其文
體平弱不免敘次煩冗之病而遺聞瑣事反藉以獲傳實足爲考古
者參稽之助又歐史止述司天職方二考而諸志俱闕凡禮樂職官
之制度選舉刑法之沿革上承唐典下開宋制者一槩無徵亦不及
薛史諸志爲有裨於文獻蓋二書繁簡各有體裁學識兼資難於偏
廢昔修與宋祁所撰新唐書事增文省足以括劉昫舊書而昫書仰
荷皇上表章今仍得列於正史況是書文雖不及歐陽而事蹟較備

又何可使隱沒不彰哉謹考次舊文釐爲梁書二十四卷唐書五十卷晉書二十四卷漢書十一卷周書二十二卷世襲列傳二卷僭僞列傳三卷外國列傳二卷志十二卷共一百五十卷別爲目錄二卷而蒐羅排纂之意則著於凡例茲不贅列焉

〔卷目〕(一至二十四)梁書(二十五至七十四)唐書(七十五至九十八)晉書(九十九至一百九)漢書(一百十至一百三十一)周書(一百三十二)(一百三十三)世襲列傳(一百三十四至一百三十六)僭僞列傳(一百三十七)(一百三十八)外國列傳(一百三十九至一百五十)志

新五代史 七十四卷

〔著者小傳〕歐陽修(見前) 徐無黨宋永康人從歐陽修學古文詞修稱其文日進如水涌山出嘗爲修注五代史得良史筆意皇祐中登進士第爲郡教授以卒

〔四庫提要〕宋歐陽修撰本名新五代史記世稱五代史者省其文也唐以後所修諸史惟是書爲私撰故當時未上於朝修歿之後始詔取其書付國子監開雕遂至今列爲正史大致褒貶祖春秋故義例謹嚴敘述祖史記故文章高簡而事實則不甚經意諸家攻駁散見他書者無論其特勒一編者如吳縝之五代史纂誤楊陸榮之五代史志疑引繩批根動中要害雖吹求或過要不得謂之盡無當也然則薛史如左氏之紀事本末賅具而斷制多疎歐史如公穀之發例褒貶分明而傳聞多謬兩家之並立當如三傳之俱存尊此一書謂可兼賅五季是以名之輕重爲史之優劣矣且周官太史掌國之六典漢法亦天下計書先上太史史之所職兼司掌故八書十志遷固相因作者沿波遞相撰述使政刑禮樂沿革分明皆所謂國之大紀也修作是書僅司天職方二考寥寥數頁餘槩從刪雖曰世衰祚短文獻無徵然王溥五代會要蒐輯遺編尙哀然得三十卷何以經

修編錄乃至全付闕如此由信史通之謬談

劉知幾欲廢表志見成史通表曆書志二篇

茲偏見元纂宋遼金三史明纂元史國朝纂明史皆仍用舊規不從

修例豈非以破壞古法不可以訓乎此書之失此為最大若不考韓

通之褒贈

案宋太祖褒贈韓通敕今載宋文鑑中

有所諱而不立傳者一節偶疎諸史

類然不足以為修病也修之文章冠冕有宋此書一筆一削尤具深

心其有裨於風教者甚大惟其考證之疎則有或不盡知者故具論

如右俾來者有所別白其註為徐無黨作頗為淺陋相傳已久今仍

並錄之焉

〔卷目〕(一至十二)本紀(十三至五十七)列傳(五十八至六十)考

(六十一至七十一)世家年譜(七十二至七十四)附錄

宋史 四百九十六卷

〔著者小傳〕脫脫蒙古八隣部人字大用年十五為皇太子怯憐口

怯薛官至元中累遷御史大夫大振綱紀中外肅然時其伯父伯顏

專恣凶虐脫脫與父計逐之至正中進中書右丞相悉更伯顏舊政中外翕然稱爲賢相時詔修遼金元三史命脫脫爲都總裁官又請修至正條格頒天下尋因病辭位召爲太傅會芝蔴李張士誠等反脫脫總制諸省軍討之以出師無功被劾削爵安置淮安尋改流雲南哈麻矯詔鳩殺之

〔四庫提要〕元托克托等奉敕撰

案托克托原作脫脫今改正

其總目題本紀四

十七志一百六十二表三十二列傳二百五十五然卷四百七十八

至卷四百八十三實爲世家六卷總目未列蓋偶遺也其書僅一代之史而卷帙幾盈五百檢校旣已難周又大旨以表章道學爲宗餘事皆不甚措意故舛謬不能殫數柯維騏宋史新編僅引容齋五筆辨正向敏中李宗諤數事未能旁及其後沈世泊撰宋史就正編綜覈前後多所匡糾如謂高宗紀紹興十三年八月戊戌洪皓至自燕而洪皓傳作七月見於內殿朱倬傳宣和五年登進士第據徽宗紀

則宣和六年策進士是爲甲辰科實非五年此紀傳之互異也宋準傳云李昉知貢舉擢準甲科會貢士徐士廉擊登聞鼓訴昉取舍非當太宗怒召準覆試後遂行殿試據選舉志則開寶六年御殿給紙筆別賜殿試遂爲常制是太祖時事誤作太宗蘇舜欽傳云康定中河東地震舜欽詣匭通疏據五行志則地震在寶元元年康定止一年無地震事此志傳之互異也杜太后傳云母范氏生五子三女太后居長而杜審琦傳則云審琦昭憲皇太后之兄太后昆仲五人審琦居長又太后傳云生太祖太宗秦王廷美據廷美傳則其母爲陳國夫人耿氏張浚傳云浚擢殿中侍御史駕幸東南後軍統制韓世忠所部逼逐諫臣墜水死浚奏奪世忠觀察使據韓世忠傳世忠乃左軍統制非後軍統制

案本紀後軍統制爲張煥紀又云後軍將孫琦等作亂逼左正言盧臣中墮水死不言世

忠

又滕康傳世忠以不能戢所部坐贖金康復論世忠無赫赫功詔

降世忠一官是奏奪世忠觀察使者乃滕康非張浚此傳文前後之

互異也譏宋史者謂諸傳載祖父之名而無事實似誌銘之體詳官階之遷除而無所刪節似申狀之文然好之者或以爲世系官資轉可藉以有考及證以他書則宋史諸傳多不足憑如晁補之傳云太子少傅迥五世孫宗慤之曾孫也父端友據黃庭堅爲補之父端友撰誌銘云晁氏世載遠矣有諱迥者以太子少保致仕諡文元君之曾王父諱迪贈刑部侍郎王父諱宗簡贈吏部尚書父諱仲偃庫部員外郎刑部視文元母弟也是補之實非迥五世孫又晁迥傳云迥子宗慤據曾鞏南豐集宗慤父名邁是補之實非宗慤曾孫謝絳傳云祖懿文父濤據范仲淹撰謝濤誌銘懿文生崇禮崇禮生濤濤生絳是謝絳實爲懿文曾孫然則所述世系豈足盡信哉洪邁傳云乾道二年知吉州六年知贛州辛卯歲饑十一年知婺州十三年拜翰林學士淳熙改元進煥章閣學士據本紀淳熙十四年有翰林學士洪邁言則淳熙改元當作紹熙改元乾道無十三年傳云辛卯歲饑

爲乾道七年則十三年上當加淳熙二字又邁以淳熙十年知太平州今瑞麻讚姑孰帖尙在太平而傳文闕載然則所敘官資又豈可盡信哉至於宋師伐遼高鳳以易州來歸見北盟會編而宋史誤作郭藥師紹興中趙鼎以奉國軍節度使出知紹興府見宰輔編年錄而宋史誤作忠武軍失載王堅之守城不降與林同之題壁自盡忠義之士尙多闕落尤爲疎漏之大者矣其所攻駁皆一一切中其失然其前後複沓牴牾尙不止此世泊亦不能悉舉也蓋其書以宋人國史爲稿本宋人好述東都之事故史文較詳建炎以後稍略理度兩朝宋人罕所紀載故史傳亦不具首尾文苑傳止詳北宋而南宋止載周邦彥等數人循吏傳則南宋更無一人是其明證至於南唐劉仁瞻之死節歐陽修五代史記司馬光通鑑俱爲之證明而此書仍作以城降李澣終於遼未嘗入宋見遼史本傳而此書仍附於李澣傳是於久列學官之書共在史局之稿尙不及互相勘證則其他

抑可知矣自柯維騏以下屢有改修然年代繇邈舊籍散亡仍以是書為稿本小小補苴亦終無以相勝故考兩宋之事終以原書為據迄今竟不可廢也

〔卷目〕(一至四十七)本紀(四十八至二百九)志(二百十至二百四十一)表(二百四十二至四百九十六)列傳

遼史 一百十六卷

〔著者小傳〕脫脫(見前)

〔四庫提要〕元托克托等奉敕撰至正三年四月詔儒臣分撰於四

年三月書成為本紀三十卷志三十一卷表八卷列傳四十六卷國

語解一卷考遼制書禁甚嚴凡國人著述惟聽刊行於境內有傳於

鄰境者罪至死見沈括夢溪筆談僧行均龍龕手鏡條下蓋國之虛實不以示敵用意至

深然以此不流播於天下迨五京兵燹之後遂至舊章散失澌滅無

遺觀袁桷修三史議蘇天爵三史質疑知遼代載籍可備修史之資

者寥寥無幾故當時所據惟耶律儼陳大任二家之書見聞既隘又
蕙功於一載之內無暇旁搜潦草成編實多疎略其閒左支右詘痕
迹灼然如每年遊幸旣具書於本紀矣復爲遊幸表一卷部族之分
合旣詳述於營衛志矣復爲部族表一卷屬國之貢使亦具見於本
紀矣復爲屬國表一卷義宗之奔唐章肅之爭國旣屢見於紀志表
矣復屢書於列傳文學僅六人而分爲兩卷伶宦官本無可紀載
而強綴三人此其重複瑣碎在史臣非不自知特以無米之炊足窮
巧婦故不得已而縷割分隸以求卷帙之盈勢使之然不足怪也然
遼典雖不足徵宋籍非無可考東都事略載遼太宗建國號大遼聖
宗卽位改大遼爲大契丹國道宗咸雍二年復改國號大遼考重熙
十六年釋迦佛舍利鐵塔記石刻今尙在古爾板蘇巴爾漢其文稱
維大契丹國與中府重熙十五年丙戌歲十一月丁丑朔云云與王
偁所記合而此書不載是其於國號之更改尙未詳也文獻通考稱

遼道宗改元壽昌洪遵泉志引李季與東北諸蕃樞要云契丹主天祚年號壽昌又引北遼通書云天祚卽位壽昌七年改爲乾統而此書作壽隆殊不思聖宗諱隆緒道宗爲聖宗之孫何至紀元而犯祖

諱考今與中故城

卽古爾板蘇巴爾漢譯言三塔也故土人亦稱三座塔

云東南七十里柏山有

安德州靈巖寺碑稱壽昌初元歲次乙亥又有玉石觀音像倡和詩

碑稱壽昌五年九月又易州有興國寺太子誕聖邑碑稱壽昌四年

七月均與洪遵所引合又老學菴筆記載聖宗改號重熙後避天祚

嫌名追稱重熙曰重和考與中故城鐵塔旁記有天慶二年釋迦定

光二佛舍利塔記稱重和十五年鑄鐵塔與陸游所記亦合而此書

均不載是其於改元之典章多舛漏也潛研堂金石文跋尾又稱據

太子誕聖邑碑諸人結銜知遼制有知軍州事通判軍州事知縣事

之名而百官志亦不載是其於制度有遺闕也至厲鶻遼史拾遺所

撫更不可以僕數此則考證未詳不得委之文獻無徵矣然其書以

實錄爲憑無所粉飾如宋史載太平興國七年戰於豐州據此書則云宋使請和宋史忠義傳有康保裔據此書則云保裔被擒而降後爲昭順軍節度使審其事勢遼史較可徵信此三史所由並行而不可偏廢歟

〔卷目〕(一至三十)本紀(三十一至六十二)志(六十三至七十)表(七十一至一百十六)列傳

金史

一百三十五卷

〔著者小傳〕脫脫(見前)

〔四庫提要〕元托克托等奉敕撰凡紀十九卷志三十九卷表四卷列傳七十三卷金人肇基東海奄有中原制度典章彬彬爲盛徵文考獻具有所資卽如大金弔伐一錄自天輔七年交割燕雲及天會三年再舉伐宋五年廢宋立楚至康王南渡所有國書誓誥冊表文狀指揮牒檄以載於故府案牘者具有年月得以編次成書是自開

國之初卽已遺聞不墜文藝傳稱元好問晚年以著作自任以金源氏有天下典章法制幾及漢唐國亡史作己所當任時金國實錄在順天張萬戶家乃言於張願爲撰述旣因有阻而止乃構野史亭著述其上凡金源君臣遺言往行採摭所聞有所得輒以片紙細字爲記錄至百餘萬言纂修金史多本其所著又稱劉祁撰歸潛志於金末之事多有足徵是相承纂述復不乏人且考托克托等進書表稱張柔歸金史於其前王鶚輯金事於其後是以纂修之命見諸敷遺之謀延祐申舉而未遑天曆推行而弗竟是元入之於此書經營已久與宋遼二史取辦倉卒者不同故其首尾完密條例整齊約而不疎贍而不蕪在三史之中獨爲最善如載世紀於卷首而列景宣帝睿宗顯宗於世紀補則酌取魏書之例曆志則採趙知微之大明曆而兼考渾象之存亡禮志則掇韓企先等之大金集禮而兼及雜儀之品節河渠志之詳於二十五埽百官志之首敘建國諸官咸本本

元元具有條理食貨志則因物力之微而歎其初法之不慎選舉志則因令史之正班而推言仕進之末弊交聘表則數宋人三失而惜其不知守險不能自強皆切中事機意存殷鑒卓然有良史之風惟其列傳之中頗多疎舛如楊朴佐太祖開基見於遼史而不爲立傳晉王宗翰之上書乞免見北盟會編潘王宗弼之遺令處分見建炎以來繫年要錄皆有關國政而本傳不書海陵之失德既見於本紀而諸嬖之猥褻復詳述於后妃傳王倫以奉使被留未嘗受職而傳列於酈瓊李成之後張邦昌傳既云宋史有傳事具宗翰等傳而復複引本紀之文列於劉豫之前皆乖體例至昌本之南走施宜生之泄謀宇文虛中之謗訕傳聞異辭皆未能核定亦由於祇據實錄未暇旁考諸書然宋史載兩國兵事多採撫宋人所記不免浮詞如采石之戰其時海陵士卒聞大定改元離心自潰虞允文攘以爲功殊非事實此書所載獨得其真泰和以後諸臣傳尤能悉其情事蓋好

問等得諸目覩與傳聞異詞者殊也卷三十三卷七十六中有闕文
蓋明代監版之脫誤今以內府所藏元版校補仍爲完帙云

〔卷目〕(一至十九)本紀(二十至五十八)志(五十九至六十二)表
(六十三至一百三十五)列傳

元史 二百十卷

〔著者小傳〕宋濂明浦江人字景濂元至正中薦授翰林院編修以
親老辭不赴隱東明山著書歷十餘年明初以書幣徵除江南儒學
提舉命授太子經修元史累轉至翰林學士承旨知制誥以老致仕
長孫慎坐法舉家謫茂州道遇疾卒正統中追諡文憲濂博極羣書
孜孜聖學爲文醇深演迤與古作者並一代禮樂制作多所裁定有
宋學士全集龍門子浦陽人物記篇海類編

〔四庫提要〕明宋濂等奉敕撰洪武二年得元十三朝實錄命修元
史以濂及王禕爲總裁二月開局天寧寺八月書成而順帝一朝史

猶未備乃命儒士歐陽佑等往北平採其遺事明年二月詔重開史局閱六月書成爲紀四十七卷志五十三卷表六卷列傳九十七卷書始頒行紛紛然已多竊議迨後來遞相考證紕漏彌彰顧炎武日知錄摘其趙孟頫諸傳備書上世贈官仍誌銘之文不知芟削河渠志言耿參政祭祀志言田司徒引案牘之語失於翦裁朱彝尊曝書亭集又謂其急於成書故前後複出因舉其一人兩傳者條其篇目爲倉猝失檢之病然元史之舛駁不在於蕝事之速而在於始事之驟以後世論之元人載籍之存者說部文集尙不下一二百種以訂史傳時見牴牾不能不咎考訂之未密其在當日則重開史局距元亡二三年耳後世所謂古書皆當日時人之書也其時有未著者有著而未成者有成而未出者勢不能裒合衆說參定異同考徐一夔始豐稿有重開史局時與王禕書云近代論史者莫過於日曆日曆者史之根柢也至起居注之設亦專以甲子起例蓋紀事之法無踰

此也元則不然不置日曆不置起居注獨中書置時政科遣一文學
掾掌之以事付史館及易一朝則國史院據所付修實錄而已其於
史事固甚疎略幸而天曆閒虞集倣六典法纂經世大典一代典章
文物粗備是以前局之史既有十三朝實錄又有經世大典可以參
稽廩而成書若順帝二十六年之事既無實錄可據又無參稽之書
惟憑採訪以足成之竊恐事未必覈言未必馴首尾未必貫穿也云
云則是書之疎漏未經屬草以前一夔已預知之非盡濂等之過矣
惟是事蹟雖難以遽詳其體例則不難自定其譌脫則不難自校也
今觀是書三公宰相分爲兩表禮樂合爲一志又分祭祀輿服爲兩
志列傳則先及釋老次以方技皆不合前史遺規而刪除藝文一志
收入列傳之中遂使無傳之人所著皆不可考尤爲乖迕又帝紀則
定宗以後憲宗以前闕載者三年未必實錄之中竟無一事其爲漏
落顯然至於姚燧傳中述其論文之語殆不可曉證以元文類則引

其送暢純甫序而互易其問答之辭殊爲顛倒此不得委諸無書可檢矣是則濂等之過無以解於後人之議者耳解縉集有與吏部侍郎董倫書稱元史舛誤承命改修云云其事在太祖末年豈非太祖亦覺其未善故有是命歟若夫曆志載許衡郭守敬之曆經李謙之曆議而并及庚午元曆之未嘗頒用者以證其異同地理志附載潘昂霄河源考而取朱思本所譯梵字圖書分註於下河渠志則北水兼及於盧溝河御河南水兼及於鹽官海塘龍山河道並詳其繕濬之宜未嘗不可爲考古之證讀者參以諸書而節取其所長可也

〔卷目〕(一至四十七)本紀(四十八至一百五)志(一百六至一百十三)表(一百十四至二百一十)列傳

明史 二百三十一卷

〔著者小傳〕張廷玉清安徽桐城人字衡臣一字硯齋康熙三十九年進士雍正間官至保和殿大學士封三等勤宣伯加太保世宗遺

詔配享太廟立朝五十年富貴壽考爲有清一代之最雍正時初立軍機與鄂爾泰同爲軍機大臣政務極繁廷玉強記慎密故世宗時恩遇最渥奉敕撰明史卒諡文和有傳經堂集

〔四庫提要〕國朝保和殿大學士張廷玉等奉敕撰乾隆四年七月

二十五日書成表進凡本紀二十四卷志七十五卷表一十三卷列

傳二百二十卷目錄四卷其進表有曰仰惟聖祖仁皇帝搜圖書於

金石羅耆俊於山林創事編摩寬其歲月蓋康熙十八年始詔修明

史並召試彭孫適等五十人入館纂修以記載浩繁異同岐出遞相

考證未遽定也又曰我世宗憲皇帝重申公慎之旨載詳討論之功

臣等於時奉敕充總裁官率同纂修諸臣開館排輯十五年之內幾

經同事遷流三百餘卷之書以次隨時告竣蓋雍正二年詔諸臣續

戴其事至是乃成書也又曰籤帙雖多牴牾互見惟舊臣王鴻緒之

史稿經名人三十載之用心進在彤幃頒來祕閣首尾略具事實頗

詳爰卽成編用爲初稿蓋康熙中戶部侍郎王鴻緒撰明史稿三百十卷惟帝紀未成餘皆排比粗就較諸家爲詳贍故因其本而增損成帙也其闕諸志一從舊例而稍變其例者二曆志增以圖以曆生於數數生算算法之句股面線今密於古非圖則分判不明藝文志惟載明人著述而前史著錄者不載其例始於宋孝王關中風俗傳劉知幾史通又反覆申明於義爲允唐以來弗能用今用之也表從舊例者四曰諸王曰功臣曰外戚曰宰輔勅新例者一曰七卿蓋明廢左右丞相而分其政於六部而都察院糾核百司爲任亦重故合而七也列傳從舊例者十三勅新例者三曰閹黨曰流氓曰土司蓋貂璫之禍雖漢唐以下皆有而士大夫趨勢附羶則惟明人爲最夥其流毒天下亦至酷別爲一傳所以著亂亡之源不但示斧鉞之誅也闖獻二寇至於亡明勦撫之失足爲炯鑒非他小醜之比亦非割據羣雄之比故別立之至於土司古謂羈縻州也不內不外釁隙易

萌大抵多建置於元而滋蔓於明控馭之道與牧民殊與禦敵國又殊故自爲一類焉若夫甲申以後仍續載福王之號乙酉以後仍兼載唐王桂王諸臣則頒行以後宣示綸綍特命改增聖人大公至正之心上洞三光下昭萬禩尤自有史籍以來所未嘗聞見者矣

〔卷目〕（一至二十四）本紀（二十五至九十九）志（一百至一百一十二）表（一百十三至三百三十二）列傳

資治通鑑 一百九十四卷

〔著者小傳〕司馬光宋夏陽人字君實七歲聞講左氏春秋卽了其大旨寶元初進士歷同知諫院仁宗時請定國嗣英宗時議濮王典禮均力持正論神宗時與王安石不合去居洛十五年絕口不論時事哲宗初起爲門下侍郎拜尙書左僕射悉去新法之爲民害者在相位八月卒贈太師温國公謚文正以居涑水鄉故世稱涑水先生著有資治通鑑及獨樂園集書儀等書 胡三省元天台人字身之

號梅磧宋寶祐進士仕至朝奉郎宋亡隱居不仕有資治通鑑音註及釋文辯誤百餘卷

〔四庫提要〕宋司馬光撰元胡三省音注光以治平二年受詔撰通鑑以元豐七年十二月戊辰書成奏上凡越十九年而後畢光進表稱精力盡於此書其採用之書正史之外雜史至三百二十二種其殘稿在洛陽者尙盈兩屋既非掇拾殘賸者可比又助其事者史記前後漢書屬劉敞三國南北朝屬劉恕唐五代屬范祖禹又皆通儒碩學非空談性命之流故其書網羅宏富體大思精爲前古之所未有而名物訓詁浩博奧衍亦非淺學所能通光門人劉安世嘗撰音義十卷世已無傳南渡後注者紛紛而乖謬彌甚至三省乃匯合羣書訂譌補漏以成此注元袁桷清容集載先友淵源錄稱三省天台人寶祐進士賈相館之釋通鑑三十年兵難稿三失乙酉歲留袁氏家塾日手鈔定注己丑寇作以書藏窖中得免案三省自序稱乙酉

徹編與楠所記正合惟楠稱定注而今本題作音注疑出三省所自
改三省又稱初依經典釋文例爲廣注九十七卷後失其書復爲之
注始以考異及所注者散入通鑑各文之下曆法天文則隨目錄所
書而附注焉此本惟考異散入各文下而目錄所有之曆法天文書
中並未附注一條當爲後人所刪削或三省有此意而未及爲歟通
鑑文繁義博貫穿最難三省所釋於象緯推測地形建置制度沿革
諸大端極爲賅備故唐紀開元十二年內注云温公作通鑑不特紀
治亂之迹而已至於禮樂曆數天文地理尤致其詳讀者如飲河之
鼠各充其量蓋本其命意所在而於此特發其凡可謂能見其大矣
至通鑑中或小有牴牾亦必明著其故如周顯王紀秦大良造伐魏
條注云大良造下當有衛鞅二字唐代宗紀董晉使回紇條注云此
韓愈狀晉之辭容有溢美又嚴武三鎮劍南條注云武只再鎮劍南
蓋因杜甫詩語致誤唐穆宗紀冊回鶻嗣君條注云通鑑例回鶻新

可汗未嘗稱嗣君文宗紀鄭注代杜悰鎮鳳翔條注云如上卷所書
杜悰鎮忠武不在鳳翔凡若此類並能參證明確而不附會以求其
合深得注書之體較尹起莘綱目發明附和回護如諧臣媚子所爲
者心術之公私學術之真僞尤相去九牛毛也雖徵撫旣廣不免檢
點偶疎如景延廣之名出師表敗軍之事庾亮此手何可著賊之語
沈懷珍之軍泮水阿那瓌之趨下口烏丸軌宇文孝伯之誤句周太
祖詔今兄之作令兄顧炎武日知錄並糾其失近時陳景雲亦摘地
理譌舛者作舉正數十條然以二三百卷之書而蹉失者僅止於此
則其大體之精密益可概見黃溥簡籍遺聞稱是書元末刊於臨海
洪武初取其版藏南京國學其見重於後來固非偶矣

〔卷目〕(一至五)周紀(六至八)秦紀(九至六十八)漢紀(六十九

至七十八)魏紀(七十九至一百十八)晉紀(一百十九至一百三

十四)宋紀(一百三十五至一百四十四)齊紀(一百四十五至一

百六十六)梁紀(一百六十七至一百七十六)陳紀(一百七十七至一百八十四)隋紀(一百八十五至二百六十五)唐紀(二百六十六至二百七十一)後梁紀(二百七十二至二百七十九)後唐紀(二百八十至二百八十五)後晉紀(二百八十六至二百八十九)後漢紀(二百九十至二百九十四)後周紀

通鑑目錄

三十卷

〔著者〕小傳〔司馬光(見前)〕

〔四庫提要〕宋司馬光撰此書亦與通鑑同奏上即進書表所謂略舉事目以備檢閱者也其法年經國緯著其歲陽歲名於上而各標

通鑑卷數於下又以劉義叟長曆氣朔閏月及列史所載七政之變著於上方復撮書中精要之語散於其閒次第釐然具有條理蓋通鑑一書包括宏富而篇帙浩繁光恐讀者倦於披尋故於編纂之時提綱挈要併成斯編使相輔而行端緒易於循覽其體全仿年表用

史記漢書舊例其標明卷數使知某事在某年某年在某卷兼用目錄之體則光之創例通鑑爲紀志傳之總會此書又通鑑之總會矣至五星凌犯之類見於各史天文志者通鑑例不備書皆列上方亦足補本書所未及書錄解題稱光患本書浩大難領略而目錄無首尾晚著通鑑舉要歷八十卷其稿在晁說之以道家紹興初謝克家任伯得而上之今其本不傳讀書志又別載通鑑節文六十卷亦稱光所自鈔今亦不傳惟此書以附通鑑得存尙足爲全書之綱領云

〔卷目〕(一)(二)周紀秦紀(三至六)漢紀(七)魏紀(八至十二)晉紀(十三)宋紀(十四)宋紀齊紀梁紀(十五)(十六)梁紀(十七)陳紀隋紀(十八)隋紀唐紀(十九至二十五)唐紀(二十六)後梁紀(二十七)後梁紀後唐紀(二十八)後唐紀後晉紀(二十九)後晉紀後漢紀(三十)後周紀

續資治通鑑 二百二十卷

一 珍做宋版印

〔著者小傳〕畢沅清鎮洋人字纓衡一字秋帆自號靈巖山人乾隆進士官至湖廣總督好著書經史小學金石地理之學無所不通嘗謂經義當宗漢儒說文當宗許氏編年之史莫善於涑水因有傳經表經典辨正續資治通鑑之作其他著述有墨子山海經晉書地理志校注靈巖山人詩文集等

〔本書略述〕編年之史莫善於涑水續之者有薛王徐三家徐雖優於薛王而所見書籍猶未完備且有詳南略北之病畢氏博稽羣書考證正史與史家宿學王西莊錢竹汀邵二雲諸人往返商榷手自裁定始宋迄元爲續資治通鑑二百二十卷凡四易稿而後成卷帙豐富敘事縝密詳贍并別爲考異各附於本條下在編年史中涑水後當以此爲最善本矣

〔卷目〕(一至八)宋紀太祖(九至十九)太宗(二十至三十五)真宗

(三十六至六十一)仁宗(六十二至六十五)英宗(六十六至七十八)神宗(七十九至八十六)哲宗(八十七至九十五)徽宗(九十六)(九十七)欽宗(九十八至一百三十七)高宗(一百三十八至一百五十一)孝宗(一百五十二)(一百五十三)光宗(一百五十四至一百六十二)寧宗(一百六十三至一百七十七)理宗(一百七十八至一百八十一)度宗(一百八十二)帝昀(一百八十三至一百九十一)元紀世祖(一百九十二至一百九十五)成宗(一百九十六)(一百九十七)武宗(一百九十八至二百)仁宗(二百一)英宗(二百二至二百四)泰定帝(二百五)明宗(二百六)文宗(二百七至二百二十)順帝

明紀 六十卷

〔著者小傳〕陳鶴清元和人字鶴齡號稽亭嘉慶元年進士官工部主事性廉潔善古文詞熟悉史事有明紀六十卷手輯至五十二卷

而卒後八卷其孫克家續成之 克家道光二十四年舉人官內閣中書少爲桐城姚瑩所器重婁縣姚椿稱爲唐魏文貞公一流人物詩學黃庭堅後入提督張國樑幕咸豐十年殉難詔贈知府銜世襲雲騎尉

〔本書略述〕此書原本正史闕參以王氏明史稿此外說部野史雖偶有采摭亦必旁證覈實而後著之凡新異詭誕之說概置不錄於三百年禮樂刑政治亂成敗忠邪是非之大端瞭如秩如不愧良史後八卷係其孫克家續成之體例如一

〔卷目〕(一至六)太祖紀(七)惠帝紀(八至十)成祖紀(十一)仁宗紀(十二)宣宗紀(十三)(十四)英宗紀(十五)(十六)景帝紀(十七)英宗後紀(十八至二十)憲宗紀(二十一至二十三)孝宗紀(二十四至二十七)武宗紀(二十八至三十六)世宗紀(三十七)(三十八)穆宗紀(三十九至四十八)神宗紀(四十九)光宗

紀(五十)(五十一)熹宗紀(五十二至五十七)莊烈紀(五十八)
福王始末(五十九)唐王始末(六十)桂王始末

逸周書

十卷 附附錄校正補遺

〔著者小傳〕不著撰人名氏 孔晁晉時人

〔四庫提要〕舊本題曰汲冢周書考隋經籍志唐藝文志俱稱此書以晉太康二年得於魏安釐王冢中則汲冢之說其來已久然晉書武帝紀及荀勗束皙傳載汲郡人不準所得竹書七十五篇具有篇名無所謂周書杜預春秋集解後序載汲冢諸書亦不列周書之目是周書不出汲冢也攷漢書藝文志先有周書七十一篇今本比班固所紀惟少一篇陳振孫書錄解題稱凡七十篇敘一篇在其末京口刊本始以序散入諸篇則篇數仍七十有一與漢志合司馬遷紀武王克商事亦與此書相應許慎作說文引周書大翰若翬雉又引周書獮有爪而不敢以擗馬融註論語引周書月令鄭玄註周禮引

周書王會註儀禮引周書北唐以閭皆在汲冢前知爲漢代相傳之舊郭璞註爾雅稱逸周書李善文選註所引亦稱逸周書知晉至唐初舊本尙不題汲冢其相沿稱汲冢者殆以梁任昉得竹簡漆書不能辨識以示劉顯顯識爲孔子刪書之餘其時南史未出流傳不審遂誤合汲冢竹簡爲一事而修隋志者誤採之耶鄭元祐作大戴禮後序稱文王官人篇與汲冢周書官人解相出入汲冢書出於晉太康中未審何由相似云云殊失之不考文獻通考所引李燾跋及劉克莊後村詩話皆以爲漢時本有此書其後稍隱賴汲冢竹簡出乃得復顯是又心知其非而巧爲調停之說惟舊本載嘉定十五年丁黼跋反覆考證確以爲不出汲冢斯定論矣其書載有太子晉事則當成於靈王以後所云文王受命稱王武王周公私計東伐俘馘殷遺暴殄原獸輦括寶玉動至億萬三發下車懸紂首太白又用之南郊皆古人必無之事陳振孫以爲戰國後人所爲似非無見然左傳

引周志勇則害上不登於明堂又引書慎始而敬終終乃不困又引書居安思危又稱周作九刑其文皆在今書中則春秋時已有之特戰國以後又輾轉附益故其言駁雜耳究厥本始終爲三代之遺文不可廢也近代所行之本皆闕程寤秦陰九政九開劉法文開保開八繁箕子耆德月令十一篇餘亦文多佚脫今考史記楚世家引周書欲起無先主父偃傳引周書安危在出令存亡在所用貨殖傳引周書農不出則乏其食工不出則乏其事商不出則三寶絕虞不出則財匱少漢書引周書無爲創首將受其咎又引周書天子不取反受其咎唐六典引周書湯放桀大會諸侯取天子之璽置天子之座今本皆無之蓋皆所佚十一篇之文也觀李燾所跋已有脫爛難讀之語則宋本已然矣

〔卷目〕(一)度訓命訓常訓文酌糴匡(二)武稱允文大武大明小明
大匡程典程寤秦陰九政九開劉法文開保開八繁(三)鄭保大開

小開文傲文傳柔武大開武小開武寶典艷謀寤傲武順武穆(四)
和寤武寤克殷大匡文政大聚世俘箕子耆德(五)商誓度邑武傲
五權成開作雒皇門大戒(六)周月時訓月令謚法明堂嘗麥本典
(七)官人王會(八)祭公史記職方(九)芮良夫太子晉王佩殷祝
周祝(十)武紀銓法器服周書序(附附錄校正補遺)

國語

二十一卷附札記一卷攷異四卷

〔著者小傳〕左邱明春秋魯太史與孔子同時或曰孔子弟子孔子
作春秋邱明述其志而作傳是爲春秋左傳又取其遺事分國纂記
是爲國語一稱爲春秋外傳 韋昭三國吳雲陽人字弘嗣少好學
能屬文歷遷太子中庶子嘗承令爲博弈論爲時所稱孫皓立爲侍
中領國史以持正爲皓所殺有國語注等 黃丕烈清吳縣人字紹
武一字蕘圃號復翁又號佞宋居士乾隆舉人官分部主事喜藏書
得宋刻百餘種顏其室曰百宋一廛刊士禮居叢書爲藏書家所重

自著有堯言印須集 汪遠孫清錢塘人字久也號小米又號借閒
漫士嘉慶舉人官內閣中書所著有詩考補遺漢書地理志校勘記
借閒生詞等

〔四庫提要〕吳韋昭注昭字宏嗣雲陽人官至中書僕射三國志作
韋曜裴松之注謂爲司馬昭諱也國語出自何人說者不一然終以
漢人所說爲近古所記之事與左傳俱迄智伯之亡時代亦復相合
中有與左傳未符者猶新序說苑同出劉向而時復牴牾蓋古人著
書各據所見之舊文疑以存疑不似後人輕改也漢志作二十一卷
其諸家所注隋志虞翻唐固本皆二十一卷王肅本二十二卷賈逵
本二十卷互有增減蓋偶然分併非有異同惟昭所注本隋志作二
十二卷唐志作二十卷而此本首尾完具實二十一卷諸家所傳南
北宋版無不相同知隋志誤一字唐志脫一字也前有昭自序稱兼
采鄭衆賈逵虞翻唐固之注今考所引鄭說虞說寥寥數條惟賈唐

二家援據駁正爲多序又稱凡所發正三百七事今考注文之中昭
自立義者周語凡服數一條國子一條號文公一條常棣一條鄭武
莊一條仲任一條叔妘一條鄭伯南也一條請隧一條瀆姓一條楚
子入陳一條晉成公一條共工一條大錢一條無射一條魯語朝聘
一條刻桷一條命祀一條郊禘一條祖文宗武一條官寮一條齊語
凡二十一鄉一條士鄉十五一條良人一條使海於有蔽一條八百
乘一條反胙一條大路龍旂一條晉語凡伯氏一條不懼不得一條
聚居異情一條貞之無報一條轅田一條二十五宗一條少典一條
十月一條嬴氏一條觀狀一條三德一條上軍一條蒲城伯一條三
軍一條罇于一條呂錡佐上軍一條新軍一條韓無忌一條女樂一
條張老一條鄭語凡十數一條億事一條秦景襄一條楚語聲子一
條懿戒一條武丁作書一條屏攝一條吳語官帥一條罇于一條自
剏一條王總百執事一條兄弟之國一條來告一條向檐一條越語

乘車一條宰一條德虐一條解骨一條重祿一條不過六十七事合以所正譌字衍文錯簡亦不足三百七事之數其傳寫有誤以六十爲三百歟崇文總目作三百十事又七字轉譌也錢曾讀書敏求記謂周語昔我先世后稷句天聖本先下有王字左右免胄而下句天聖本下下有拜字今本皆脫去然所引注曰云云與此本絕不相同又不知何說也此本爲衍聖公孔傳鐸所刊如魯語公父文伯飲酒一章注中此堵父詞四字當在將使鼈長句下而誤入遂出二字下小小舛譌亦所不免然較諸坊本則頗爲精善自鄭衆解詁以下諸書並亡國語注存於今者惟昭爲最古黃震日鈔嘗稱其簡潔而先儒舊訓亦往往散見其中如朱子注論語無所取材毛奇齡詆其訓材爲裁不見經傳改從鄭康成桴材之說而不知鄭語計億事材兆物句昭注曰計算也材裁也已有此訓然則奇齡失之眉睫閒矣此亦見其多資考證也

〔卷目〕(一至三)周語(四)(五)魯語(六)齊語(七至十五)晉語(十六)鄭語(十七)(十八)楚語(十九)吳語(二十)(二十一)越語(附札記一卷考異四卷)

戰國策

三十三卷附札記三卷

〔著者小傳〕高誘後漢涿郡人盧植之弟子建安中辟司空掾歷官東郡濮陽令遷河東監著有戰國策及淮南子註 姚宏宋剡人字令聲一曰伯聲宣和在上庠南渡後初任監杭州稅調知衢州江縣山秦檜以宿怨陷之死 黃丕烈(見前)

〔四庫提要〕舊本題漢高誘注今考其書實宋姚宏校本也文獻通考引崇文總目曰戰國策篇卷亡闕第二至第十第三十一至第三十三闕又有後漢高誘注本二十卷今闕第一第五第十一至二十止存八卷曾鞏校定序曰此書有高誘注者二十一篇或曰三十二篇崇文總目存者八篇今存者十篇此爲毛晉汲古閣影宋鈔本雖

三十三卷皆題曰高誘注而有誘注者僅二卷至四卷六卷至十卷與崇文總目八篇數合又最末三十二三十三兩卷合前八卷與曾鞏序十篇數合而其餘二十三卷則但有考異而無注其有注者多冠以續字其偶遺續字者如趙策一郟疵注雒陽注皆引唐林寶元和姓纂趙策二甌越注引魏孔衍春秋後語魏策三芒卯注引淮南子注衍與寶在誘後而淮南子注卽誘所自作其非誘注可無庸置辨蓋鞏校書之時官本所少之十二篇誘書適有其十惟闕第五第三十一誘書所闕則官書悉有之亦惟闕第五第三十一意必以誘書足官書而又於他家書內撫二卷補之此官書誘書合爲一本之由然鞏不言校誘注則所取惟正文也迨姚宏重校之時乃併所存誘注入之故其自序稱不題校人并題續注者皆余所益知爲先載誘注故以續爲別且凡有誘注復加校正者並於夾行之中又爲夾行與無注之卷不同知校正之時注已與正文並列矣卷端曾鞏李

格王覺孫朴諸序跋皆前列標題各題其字而宏序獨空一行列於末前無標題序中所言體例又一一與書合其爲宏校本無疑其卷題高誘名者殆傳寫所增以贗古書耳書中校正稱曾者曾鞏本也稱錢者錢藻本也稱劉者劉敞本也稱集者集賢院本也無姓名者卽宏序所謂不題校人爲所加入者也其點勘頗爲精密吳師道作戰國策鮑注補正亦稱爲善本是元時猶知注出於宏不知毛氏宋本何以全題高誘考周密癸辛雜識稱賈似道嘗刊是書豈其門客廖瑩中等皆媒褻下流昧於檢校一時誤題毛氏適從其本影鈔歟近時揚州所刊卽從此本錄出而仍題誘名殊爲沿誤今於原有注之卷題高誘注姚宏校正續注原注已佚之卷則惟題姚宏校正續注而不列誘名庶幾各存其真宏字令聲一曰伯聲剡川人嘗爲刪定官以忤直忤秦檜瘐死大理獄中蓋亦志節之士不但其書足重也

〔卷目〕(一)東周(二)西周(三至七)秦(八至十三)齊(十四至十七)楚(十八至二十一)趙(二十二至二十五)魏(二十六至二十八)韓(二十九至三十一)燕(三十二)宋衛(三十三)中山(附札記三卷)

山海經箋疏

十八卷 附圖讚訂譌各一卷

〔著者小傳〕郭璞(見經部)郝懿行(見經部)

〔本書略述〕山海經十八卷晉郭璞註已見四庫著錄略稱卷首有

劉秀校上奏稱爲伯益所作案山海經之名始見史記大宛傳司馬遷但云禹本紀山海經所有怪物余不敢言而未言爲何人所作列子稱大禹行而見之伯益知而名之夷堅聞而志之似乎卽指此書而不言其名山海經王充論衡別通篇曰禹主行水益主記異物海外山表無所不至以所見聞作山海經趙煜吳越春秋所說亦同惟隋書經籍志云蕭何得秦圖書後又得山海經相傳夏禹所記其文

稍異然似皆因列子之說推而衍之觀書中載夏后啓周文王及秦漢長沙象郡餘暨下嶠諸地名斷不作於三代以上殆周秦闕人所述而後來好異者又附益之歟觀楚詞天問多與相符使古無是言屈原何由杜撰朱子楚詞辨證謂其反因天問而作似乎不然至王應麟王會補傳引朱子之言謂山海經記諸異物飛走之類多云東向或曰東首疑本因圖畫而述之古有此學如九歌天問皆其類云云則得其實矣郭璞註是書見於晉書本傳隋唐二志皆云二十三卷今本乃少五卷疑後人併其卷帙以就劉秀奏中一十八篇之數非闕佚也隋唐志又有郭璞山海經圖讚二卷今其讚猶載璞集中其圖則宋志已不著錄知久佚矣舊本所載劉秀奏中稱其書凡十八篇與漢志稱十三篇者不合七略卽秀所定不應自相牴牾疑其贋託然璞序已引其文相傳既久今仍併錄焉書中序述山水多參以神怪故道藏收入太玄部競字號中究其本旨實非黃老之言然

道里山川率難考據案以耳目所及百不一真諸家並以爲地理書之冠亦爲未允核實定名實則小說之最古者爾

以上四庫提要語

此本係

清郝懿行箋疏先生以吳氏任臣山海經廣注畢氏沅山海經校注徵引雖博而於辨析異同刊正譌謬猶有未詳特採二家所長作爲箋疏箋以補注疏以證經別爲訂譌一卷附於篇末計創通大義者百餘條是正譌文者三百餘條凡所指擿悉有依據足爲考證之資

〔卷目〕(一)南山經(二)西山經(三)北山經(四)東山經(五)中山

經(六)海外南經(七)海外西經(八)海外北經(九)海外東經

(十)海內南經(十一)海內西經(十二)海內北經(十三)海內東

經(十四)大荒東經(十五)大荒南經(十六)大荒西經(十七)大

荒北經(十八)海內經(附圖讚訂譌各一卷并敘錄箋疏敘)

竹書紀年 二卷

〔著者小傳〕不著撰人名氏

〔四庫提要〕案晉書束皙傳晉太康二年汲縣人發魏襄王冢得古

書七十五篇中有竹書紀年十三篇今世所行題沈約注亦與隋志

相符顧炎武考證之學最爲精核所作日知錄中往往引以爲據然

反覆推勘似非汲冢原書考平王東遷以後惟載晉事三家分晉以

後惟載魏事是魏承晉史之明驗然晉靈公桃園之事董狐所書明

見左傳孔子稱趙盾爲法受惡足知未改史文乃今本所載仍以趙

穿蔽獄則非晉史之舊也束皙傳稱竹書夏年多殷益干啓位啓殺

之今本皆無此文又杜預注左傳攜王奸命句引服虔說以爲伯服

䟽併引束皙以爲伯盤今本乃有余臣之說使竹書原有此文不應

二人皆未睹則非束皙杜預所見本也郭璞注穆天子傳引紀年七

條以今本校之相同者三條璞稱紀年而今在注中者三條璞時不

應先有注且三條併爲一條文亦不屬其穆天子見西王母西王母

止之曰有鳥鴈人一條今本無之則非郭璞所見本也隋書經籍志

曰紀年皆用夏正建寅之月爲歲首今本自入春秋以後時月並與
經同全從周正則非隋時所見本也水經注引竹書七十六條皆以
晉國紀年如春秋之爲魯史而此本晉國之年皆附周下又所引出
公六年荀瑤成宅陽梁惠王元年鄴師邯鄴師次于平陽魏襄王六
年秦取我焦及齊師伐趙東鄙圍中牟諸條今本皆無其他年月亦
多舛異則非酈道元所見本也史通引竹書文王殺季歷今本作文
丁又引竹書鄭桓公厲王之子今本錫王子多父命居洛在宣王二
十二年王子多父爲鄭公在幽王二年皆不云厲王子則非劉知幾
所見本也文選注引竹書五條今惟有太甲殺伊尹一條則非李善
所見本也開元占經引竹書四條今本皆無則非瞿曇悉達所見本
也史記索隱引竹書晉出公二十三年奔楚乃立昭公之孫是爲敬
公今本作出公薨又引秦與衛戰岸門惠王後元十一年會齊于平
阿十三年會齊于甄齊桓公君母齊宣王后宋易成肝廢君自立楮

里疾圍蒲七條今本皆無則非司馬貞所見本也穀梁傳疏引竹書紀年周昭王膠舟之事以駁呂氏春秋今本但曰王陟無膠舟事則非楊士勛所見本也元豐九域志引竹書陰司馬敗燕公子翌于武垣一條今本亦無則非王存所見本也路史引竹書周武王年五十四辨武王非年九十三今本乃作九十三又注引竹書夏后不降六十九年證世紀五十九年之異今本乃亦作五十九路史又引梁惠成八年兩骨于赤鞮注又引夏桀末年社圻裂今本並無則非羅泌羅莘所見本也戰國策注引竹書魏救中山塞集胥口今本無之則非鮑彪所見本也廣川書跋引竹書秦穆公十一年取靈邱今本無之則非董道所見本也雖其他證以竹書往往相合然胤征稱辰弗集于房說命稱舊學于甘盤均出梅賾古文尙書在西晉之後不應先見竹書豈亦明人鈔合諸書以爲之如十六國春秋類歟觀其以春秋合夏正斷斷爲胡傳盛行以後書也沈約注外又有小字夾行

之注不知誰作中殷小庚一條稱約案史記作太庚則亦當爲約說
考元和郡縣志魏武定七年始置海州隋煬帝時始置衛縣而注舜
在鳴條一條稱今海州夏啓十一年放武觀一條稱今頓丘衛縣則
非約語矣又所注惟五帝三王最詳他皆寥寥而五帝三王皆全鈔
宋書符瑞志語約不應既著於史又不易一字移而爲此本之注然
則此注亦依託耳自明以來流傳已久姑錄之以備一說其僞則終
不可掩也

〔卷目〕(上)黃帝軒轅氏至帝辛(下)周武王至隱王

穆天子傳 六卷 附錄一卷

〔著者小傳〕不著撰人名氏 郭璞(見經部)

〔四庫提要〕晉郭璞註前有荀勗序案東晉傳云太康二年汲縣人
不準盜發魏襄王墓得竹書穆天子傳五篇又雜書十九篇周食田

法周書論楚事周穆王美人盛姬事案今盛姬事載穆天子傳第六

卷蓋卽東哲傳所謂雜書之一篇也尋其文義應歸此傳東哲傳別出之非也此書所紀雖多夸言寡實然所謂西王母者不過西方一國君所謂縣圃者不過飛鳥百獸之所飲食爲大荒之圃澤無所謂神仙怪異之事所謂河宗氏者亦僅國名無所謂魚龍變見之說較山海經淮南子猶爲近實郭璞註爾雅於西至西王母句不過曰西方昏荒之國於河出崑崙墟句雖引大荒西經而不言其靈異其註此書乃頗引志怪之談蓋釋經不敢不謹嚴而箋釋雜書則務矜博洽故也

〔卷目〕(一至六)皆古文(附錄一卷)

家語十卷

〔著者小傳〕王肅三國魏郟人字子雍仕至中領軍散騎常侍善賈馬之學而不好鄭氏采會同異爲尙書詩論語三禮左氏解及撰定父朗所作易傳皆列於學官其所論駁朝廷典制郊祀宗廟喪紀輕

重凡百餘篇卒諡景有孔子家語注

〔四庫提要〕魏王肅註肅字子雍東海人官至中領軍散騎常侍事蹟具三國志本傳是書肅自序云鄭氏學行五十載矣義理不安違錯者多是以奪而易之孔子二十二世孫有孔猛者家有其先人之書昔相從學頃還家方取以來與予所論有若重規疊矩云云是本自肅始傳也考漢書藝文志有孔子家語二十七卷顏師古註云非今所有家語禮樂記稱舜彈五弦之琴以歌南風鄭註其詞未聞孔穎達疏載肅作聖證論引家語阜財解愠之詩以難康成又載馬昭之說謂家語王肅所增加非鄭所見故王柏家語考曰四十四篇之家語乃王肅自取左傳國語荀孟二戴記割裂織成之孔衍之序亦王肅自爲也獨史繩祖學齋佔畢曰大戴一書雖列之十四經然其書大抵雜取家語之書分析而爲篇目其公冠篇載成王冠祝辭內有先帝及陛下字周初豈曾有此家語止稱王字當以家語爲正

云云今考陛下離顯先帝之光曜已下篇內已明云孝昭冠辭繩祖
誤連爲祝雍之言殊未之考蓋王肅襲取公冠篇爲冠頌已誤合孝
昭冠辭於成王冠辭故刪去先帝陛下字竄改王字家語襲大戴非
大戴襲家語就此一條亦其明證其割裂他書亦往往類此反覆考
證其出於肅手無疑特其流傳已久且遺文軼事往往多見於其中
故自唐以來知其僞而不能廢也其書至明代傳本頗稀故何孟春
所註家語自云未見王肅本王鏊震澤長語亦稱家語今本爲近世
妄庸所刪削惟有王肅註者今本所無多具焉則亦僅見之也明代
所傳凡二本閩徐燠家本中缺二十餘頁海虞毛晉家本稍異而首
尾完全今徐本不知存佚此本則毛晉所校刊較之坊刻猶爲近古
者矣

〔卷目〕(一)相魯始誅王言解大婚解儒行解問禮五儀解(二)致思

三怒好生(三)觀周弟子行賢君辯政(四)六本辯物哀公問政

(五)顏回子路初見在厄入官困誓五帝德(六)五帝執轡本命解
論禮(七)觀鄉郊問五刑解刑政禮運(八)冠頌解廟制解辯樂問
玉屈節解(九)七十二弟子解本姓解終記解正論解(十)曲禮子
貢問曲禮子夏問曲禮公西赤問

晏子春秋

七卷附音義二卷校勘二卷

〔著者小傳〕晏嬰春秋齊大夫弱子字平仲事靈公莊公相景公節
儉力行食不重肉妾不衣帛一狐裘三十年名顯諸侯後人采嬰行
事及其諫諍之言爲晏子春秋 孫星衍(見經部) 黃以周清定
海人字元同號傲季同治舉人官分水訓導事親孝爲學不拘漢宋
門戶尤達三禮撰禮書通故百卷博采衆說而折衷之俞樾稱其精
核光緒間主講南菁書院十五年晚選處州教授以特薦授內閣中
書卒年七十有二

〔四庫提要〕舊本題齊晏嬰撰晁公武讀書志嬰相景公此書著其

行事及諫諍之言崇文總目謂後人採嬰行事爲之非嬰所撰然則是書所記乃唐人魏徵諫錄李絳論事集之流特失其編次者之姓名耳題爲嬰者依託也其中如王士禎池北偶談所摘齊景公圍人一事鄙倍荒唐殆同戲劇則妄人又有所竄入非原本矣劉向班固俱列之儒家中惟柳宗元以爲墨子之徒有齊人者爲之其旨多尙兼愛非厚葬久喪者又往往言墨子聞其道而稱之薛季宣浪語集又以爲孔叢子詰墨諸條今皆見晏子書中則嬰之學實出於墨蓋嬰雖略在墨翟前而史角止魯實在惠公之時見呂氏春秋仲春紀當染篇故嬰能先宗其說也其書自史紀管晏列傳已稱爲晏子春秋故劉知幾史通稱晏子虞卿呂氏陸賈其書篇第本無年月而亦謂之春秋然漢志惟作晏子隋志乃名春秋蓋二名兼行也漢志隋志皆作八篇至陳氏晁氏書目乃皆作十二卷蓋篇帙已多有更改矣此爲明李氏綿眇閣刻本內篇分諫上諫下問上問下雜上雜下

六篇外篇分上下二篇與漢志八篇之數相合若世所傳烏程閔氏刻本以一事而內篇外篇複見所記大同小異者悉移而夾註內篇下殊爲變亂無緒今故仍從此本著錄庶幾猶略近古焉

〔卷目〕(一)內篇諫上(二)內篇諫下(三)內篇問上(四)內篇問下(五)內篇雜上(六)內篇雜下(七)外篇(附音義校勘各二卷)

越絕書 十五卷

〔著者小傳〕不著撰人名氏

〔四庫提要〕不著撰人名氏書中吳地傳稱勾踐徙瑯琊到建武二十八年凡五百六十七年則後漢初人也書末敘外傳記以廋詞隱其姓名其云以去爲姓得衣乃成是袁字也厥名有米覆之以庚是康字也禹來東征死葬其疆是會稽人也又云文詞屬定自于邦賢以口爲姓承之以天是吳字也楚相屈原與之同名是平字也然則此書爲會稽袁康所作同郡吳平所定也王充論衡按書篇曰東番

鄒伯奇臨淮袁太伯袁文術會稽吳君高周長生之輩位雖不至公

卿誠能知之囊橐文雅之英雄也觀伯奇之玄思太伯之易童句按童

疑作文術之箴銘君高之越紐錄長生之洞曆劉子政揚子雲不能

過也所謂吳君高殆即平字所謂越紐錄殆即此書歟楊慎丹鉛錄

胡侍珍珠船田藝衡留青日札皆有是說核其文義一一脗合隋唐

志皆云子貢作非其實矣其文縱橫曼衍與吳越春秋相類而博麗

奧衍則過之中如計倪內經軍氣之類多雜術數家言皆漢人專門

之學非後來所能依託也此本與吳越春秋皆大德丙午紹興路所

刊卷末一跋諸本所無惟申明復仇之義不著姓名詳其詞意或南

宋人所題耶鄭明選稗言引文選七命注引越絕書大翼一艘十丈

中翼九丈六尺小翼九丈又稱王鑿震澤長語引越絕書風起震方

云云謂今本皆無此語疑更有全書惜未之見按崇文總目稱越絕

書舊有內記八外傳十七今文題闕舛裁二十篇是此書在北宋之

初已佚五篇選注所引蓋佚篇之文王鏊所稱亦他書所引佚篇之文以爲此本之外更有全書則明選誤矣別有續越絕書二卷上卷曰內傳本事吳內傳德序記子游內經外傳越絕後語西施鄭旦外傳下卷曰越外傳雜事別傳變越上別傳變越下經內雅琴考序傳後記朱彝尊經義考謂爲錢馱僞撰詭云得之石匣中馱與彝尊友善所言當實今未見傳本其僞妄亦不待辨以其續此書而作又卽託於撰此書之人恐其幸而或傳久且亂真又恐其或不能傳而好異者耳聞其說且疑此書之真有續編故附訂其僞於此釋來者之惑焉

〔卷目〕(一)外傳本事荆平王內傳(二)外傳記吳地傳(三)吳內傳

(四)計倪內經(五)請糴內傳(六)外傳紀策考(七)外傳記范伯內傳陳成恆(八)外傳記地傳(九)外傳計倪(十)外傳記吳王占夢(十一)外傳記寶劍(十二)內經九術(十三)外傳枕中(十四)

外傳春申君(十五)篇敘外傳記

吳越春秋 十卷

〔著者小傳〕趙曄漢山陰人字長君少爲縣吏奉檄迎督郵曄恥爲廝役遂棄車馬去詣犍爲從杜撫受韓詩究竟其術積二十年乃歸州召補從事不就後舉有道卒於家著吳越春秋詩細歷神淵蔡邕讀詩細而歎息以爲長於論衡邕還京師傳之學者咸誦習焉

〔四庫提要〕漢趙曄撰曄山陰人見後漢書儒林傳是書前有舊序稱隋唐經籍志皆云十二卷今存者十卷殆非全書又云楊方撰吳越春秋削繁五卷皇甫遵撰吳越春秋傳十卷此二書今人罕見獨曄書行於世史記注有徐廣所引吳越春秋語而索隱以爲今無此語他如文選注引季札見遺金事吳地記載闔閭時夷亭事及水經注嘗載越事數條類皆援據吳越春秋今曄本咸無其文云云考證頗爲詳悉然不著名姓漢魏叢書所載合十卷爲六卷而削去此序

併注亦不題撰人彌失其初此本爲元大德十年丙午所刊後有題識云前有文林郎國子監書庫官徐天祐音注然後知注中稱徐天祐曰者卽注者之自名非援引他書之語惟其後又列紹興路儒學學錄留堅學正陳昺伯教授梁相正議大夫紹興路總管提調學校官劉克昌四人不知序出誰手耳擘所述雖稍傷曼衍而詞頗豐蔚其中如伍尙占甲子之日時加於巳范蠡占戊寅之日時加日出有騰蛇青龍之語文種占陰畫六陽畫三有玄武天空天關天梁天一神光諸神名皆非三代卜筮之法未免多所附會至於處女試劍老人化猿公孫聖三呼三應之類尤近小說家言然自是漢晉閒稗官雜記之體徐天祐以爲不類漢文是以馬班史法求之非其倫也天祐注於事迹異同頗有考證其中如季孫使越子期私與吳爲市之類雖猶有未及詳辨者而原書失實之處能糾正者爲多其旁核衆說不徇本書猶有劉孝標注世說新語之遺意焉

〔卷目〕(一)吳太伯傳(二)吳王壽夢傳(三)王僚使公子光傳(四)闔閭內傳(五)夫差內傳(六)越王無余外傳(七)句踐入臣外傳(八)句踐歸國外傳(九)句踐陰謀外傳(十)句踐伐吳外傳

列女傳 八卷

〔著者小傳〕劉向漢楚元王之後字子政本名更生初爲諫大夫宣帝招選名儒俊材向以通達能屬文與焉爲人簡易無威儀專積思於經術晝誦書傳夜觀星宿或不寐達旦數上封事以陰陽休咎論時政得失語甚切直元帝時爲中壘校尉時外戚王氏擅權帝數欲用爲九卿爲王氏及諸大臣所持官終不遷所著有洪範五行傳列女傳列仙傳新序說苑等書 梁端清錢唐人適同邑汪遠孫

〔本書略述〕列女傳八卷漢劉向撰已見四庫著錄略稱漢書藝文志儒家類載向所序六十七篇註曰新序說苑世說列女傳頌圖也隋書經籍志雜傳類載列女傳十五卷註曰劉向撰曹大家註其書

屢經傳寫至宋代已非復古本故曾鞏序錄稱曹大家所註離其七篇爲十四與頌義凡十五篇而益以陳嬰母及東漢以來凡十六事非向本書然也嘉祐中集賢校理蘇頌始以頌義編次復定其書爲八篇與十五篇者並藏於館閣是鞏校錄時已有二本也又王回序曰此書有母儀賢明仁智貞順節義辨通嬖孽等目而各頌其義圖其狀總爲卒篇傳如太史公記頌如詩之四言而圖爲屏風然世所行向書乃分傳每篇上下併頌爲十五卷其十二傳無頌三傳同時人五傳其後人通題曰向撰題其頌曰向子歆撰與漢史不合故崇文總目以陳嬰母等十六傳爲後人所附予以頌考之每篇皆十五傳耳則凡無頌者宜皆非向所奏書不特自陳嬰母爲斷也向所序書多散亡獨此幸存而復爲他手所亂故併錄其目而以頌證之刪爲八篇號古列女傳餘十二傳其文亦奧雅可喜故又以時次之別爲一篇號續列女傳又稱直祕閣呂縉叔集賢校理蘇子容象山令

林次中各言嘗見母儀賢明四傳於江南人家其畫爲古佩服而各題其頌像側是回所見一本所聞一本所刪定又一本也錢曾讀書敏求記曰此本始於有虞二妃至趙悼后號古列女傳周郊婦人至東漢梁嬀等以時次之別爲一篇號續列女傳頌義大序列於目錄前小序七篇散見目錄中閒頌見各人傳後而傳各有圖卷首標題晉大司馬參軍顧愷之圖書蘇子容嘗見江南人家舊本其畫爲古佩服各題其頌像側者與此恰相符合定爲古本無疑云云此本卽曾家舊物題識印記並存驗其版式紙色確爲宋槧誠希覯之珍笈惟蘇頌等所見江南本在王回刪定以前而此本八篇之數與回本合古列女傳續列女傳之目亦與回本合卽嘉祐八年回所重編之本曾據以爲江南舊本則稍失之耳其頌本向所作曾鞏及回所言不誤而晁公武讀書志乃執隋志之文詆其誤信顏籀之註不知漢志舊註凡稱師古曰者乃籀註其不題姓氏者皆班固之自註以頌

圖屬向乃固說非籀說也考顏氏家訓稱列女傳劉向所造其子歆又作頌是譌傳頌爲歆作始於六朝修隋志時去之推僅四五十年襲其誤耳豈可遽以駁漢書乎續傳一卷曾鞏以爲班昭作其說無證特以意爲之晁公武竟以爲項原作則舛謬彌甚隋志載項原列女後傳十卷非一卷也必牽引旁文曲相附會則隋志又有趙母注列女傳七卷高氏列女傳八卷皇甫謐列女傳六卷綦母邃列女傳七卷又有曹植列女傳頌一卷繆襲列女讚一卷將續傳亦可牽爲趙母等頌亦可牽爲曹植等矣又豈止劉歆班昭項原乎今前七卷及頌題向名續傳一卷則不署撰人庶幾核其實而闕所疑焉

以上四庫

提要

此本係清汪遠孫妻梁端所校釋而刻之振綺堂者臚舉同異

音義並述張之洞書目答問特爲著錄亦可見其校釋之詳核矣

〔卷目〕(一)母儀傳(二)賢明傳(三)仁智傳(四)貞順傳(五)節義

傳(六)辯通傳(七)嬖孽傳(八)續列女傳

說苑二十卷

〔著者小傳〕劉向〔見前〕

〔四庫提要〕漢劉向撰是書凡二十篇隋唐志皆同崇文總目云今存者五篇餘皆亡曾鞏校書序云得十五篇於士大夫家與舊爲二十篇晁公武讀書志云劉向說苑以君道臣術建本立節貴德復恩政理尊賢正諫法誠善說奉使權謀至公指武談叢雜言辨物修文爲目陽嘉四年上之闕第二十卷曾子固所得之二十篇正是析十九卷作修文上下篇耳今本第十法誠篇作敬慎而修文篇後有反質篇陸游渭南集記李德芻之言謂得高麗所進本補成完書則宋時已有此本晁公武偶未見也其書皆錄遺聞佚事足爲法戒之資者其例略如詩外傳葉大慶考古質疑摘其趙襄子賞晉陽之功孔子稱之一條諸御已諫楚莊王築臺引伍子胥一條晏子使吳見夫差一條晉太史屠餘與周桓公論晉平公一條晉勝智氏後闔閭襲

郢一條楚左史倚相論越破吳一條晏子送曾子一條晉昭公時戰
邲一條孔子對趙襄子一條皆時代先後邈不相及又介子推舟之
僑並載其龍蛇之歌而之僑事尤舛黃朝英緗素雜記亦摘其固桑
對晉平公論養士一條新序作舟人古乘對趙簡子又楚文王爵筦
饒一條新序作楚共王爵筦蘇二書同出向手而自相矛盾殆捃拾
衆說各據本文偶爾失於參校也然古籍散佚多賴此以存如漢志
河閒獻王八篇隋志已不著錄而此書所載四條尙足見其議論醇
正不愧儒宗其他亦多可採擇雖閒有傳聞異詞固不以微瑕累全
璧矣

〔卷目〕(一)君道(二)臣術(三)建本(四)立節(五)貴德(六)復恩
(七)政理(八)尊賢(九)正諫(十)敬慎(十一)善說(十二)奉使
(十三)權謀(十四)至公(十五)指武(十六)叢談(十七)雜言
(十八)辨物(十九)修文(二十)反質

東觀漢記

二十四卷附東觀漢記范書異同

珍做宋版耳

〔著者小傳〕清乾隆四十二年敕諸史臣校補此書之沿革具詳原書卷首史臣所上表文內

〔四庫提要〕案東觀漢記隋書經籍志稱長水校尉劉珍等撰今考之范書珍未嘗爲長水校尉且此書創始在明帝時不可題珍等居首案范書班固傳云明帝始詔班固與睢陽令陳宗長陵令尹敏司隸從事孟異共成世祖本紀固又撰功臣平林新市公孫述事作列傳載紀二十八篇此漢記之初創也劉知幾史通古今正史篇云安帝詔史官謁者僕射劉珍諫議大夫李尤雜作紀表名臣節士儒林外戚諸傳起建武訖永初范書劉珍傳亦稱鄧太后詔珍與劉騶駘作建武以來名臣傳此漢記之初續也史通又云珍尤繼卒復命侍中伏無忌與諫議大夫黃景作諸王王子功臣恩澤侯表與單于西羌傳地理志元嘉元年復令大中大夫邊韶大軍營司馬崔實議郎

朱穆曹壽雜作孝穆崇二皇及順烈皇后傳又增外戚傳入安思等
后儒林傳入崔篆諸人實壽又與議郎延篤雜作百官表順帝功臣
孫程郭願鄭衆蔡邕等傳凡百十有四篇號曰漢記范書伏湛傳亦
云元嘉中桓帝詔伏無忌與黃景崔實等共撰漢記延篤傳亦稱篤
與朱穆邊韶共著作東觀此漢記之再續也蓋至是而史體粗備乃
肇有漢記之名史通又云熹平中光祿大夫馬日磾議郎蔡邕楊彪
盧植著作東觀接續紀傳之可成者而邕別有朝會車服二志後坐
事徙朔方上書求還續成十志董卓作亂舊文散逸及在許都楊彪
頗存註紀案范書蔡邕傳邕在東觀與盧植韓說等撰補後漢記所
作靈紀及十意又補諸列傳四十二篇因李傕之亂多不存盧植傳
亦稱熹平中植與邕說並在東觀補續漢記又劉昭補註司馬書引
袁崧書云劉洪與蔡邕共述律曆紀又引謝承書云胡廣博綜舊儀
蔡邕因以爲志又引謝沈書云蔡邕引中興以來所修者爲祭祀志

章懷太子范書註稱邕上書云臣科條諸志所欲刪定者一所當接續者四前志所無臣欲著者五此漢記之三續也其稱東觀者後漢書註引雒陽宮殿名云南宮有東觀范書竇章傳云永初中學者稱東觀爲老氏藏室道家蓬萊山蓋東漢初著述在蘭臺至章和以後圖籍盛於東觀修史者皆在是焉故以名書隋志稱書凡一百四十三卷而新舊唐書志則云一百二十六卷又錄一卷蓋唐時已有闕佚隋志又稱是書起光武訖靈帝今考列傳之文闕紀及獻帝時事蓋楊彪所補也晉時以此書與史記漢書爲三史人多習之故六朝及初唐人隸事釋書類多徵引自唐章懷太子集諸儒註范書盛行於代此書遂微北宋時尚有殘本四十三卷趙希弁讀書附志邵博聞見後錄並稱其書乃高麗所獻蓋已罕得南宋中興書目則止存鄧禹吳漢賈復耿弇寇恂馮異祭遵景丹蓋延九傳共八卷有蜀中刊本流傳而錯誤不可讀上蔡任昉始以祕閣本讎校羅願爲序行

之刻版於江夏又陳振孫書錄解題稱其所見本卷第凡十二而闕第七第八二卷卷數雖似稍多而核其列傳之數亦止九篇則固無異於書目所載也自元以來此書已佚永樂大典於鄧吳賈耿諸韻中並無漢記一語則所謂九篇者明初卽已不存矣本朝姚之駟撰後漢書補逸曾蒐集遺文析爲八卷然所採祇據劉昭續漢書十志補註後漢書註虞世南北堂書鈔歐陽詢藝文類聚徐堅初學記五書又往往掇拾不盡挂漏殊多今謹據姚本舊文以永樂大典各韻所載參考諸書補其闕逸所增者幾十之六其書久無刻版傳寫多譌姚本隨文鈔錄謬戾百出且漢記目錄雖佚而紀表志傳載記諸體例史通及各書所載梗概尙一一可尋姚本不加考證隨意標題割裂顛倒不可殫數今悉加釐正分爲帝紀三卷年表一卷志一卷列傳十七卷載記一卷其篇第無可考者別爲佚文一卷而以漢紀與范書異同附錄於末雖殘珪斷璧零落不完而古澤斑斕罔非瑰

寶書中所載如章帝之詔增修羣祀杜林之議郊祀東平王蒼之議廟舞並一朝大典而范書均不詳載其文他如張順預起義之謀王常贊昆陽之策楊政之嚴正趙勤之潔清亦復概從闕如殊為踈略惟賴茲殘笈讀史者尙有所稽則其有資考證良非淺鮮尤不可不亟為表章矣

〔卷目〕(一至三)帝紀(四)年表(五)志(六至二十二)列傳(二十

三)載記(二十四)佚文(附東觀漢記范書異同)

晉略 六十卷 附表及序目

〔著者小傳〕周濟清荆溪人字保緒一字介存號未齋晚號止庵嘉

慶進士官淮安府教授少與同郡李兆洛涇縣包世臣以經世學相

切劘兼通兵家言潛心著述所著書以晉略為最著又有說文字系

韻原介存齋詩味雋齋詞史義

〔本書略述〕周氏好讀史尤好觀古將帥兵略暇則兼習騎射擊刺

洞曉兵機隱然負用世志一腔蘊蓄磅礴無寄乃著爲晉略一書體例精深識議英特其諸論贊中於攻取防守地勢必反覆曲折確有指歸俾覽者得所依據自言此書爲一生精力所聚實亦一生志略所寓也其行文亦雅潔簡練篇幅略於晉書而事實之詳贍則過之

〔卷目〕本紀（一至六）表（一至五）列傳（一至二十六）國傳（一至

十一）彙傳（一至七）（附序目）

貞觀政要 十卷

〔著者小傳〕吳兢唐浚儀人少厲志貫知經史詔直史館修國史累遷起居郎明皇時屢陳得失帝頗納之封長興縣男卒兢敘事簡核號良史初與劉子玄撰武后實錄敘張昌宗誘張說誣執魏元忠事及說爲相屢以情懇改辭曰徇公則何名實錄卒不改世稱董狐云又撰貞觀政要大唐春秋樂府古題要解

〔四庫提要〕唐吳兢撰兢汴州浚儀人以魏元忠薦直史館累官太

子左庶子貶荊州司馬歷洪舒二州刺史入爲恆王傅天寶初年八十卒事蹟具唐書本傳宋中興書目稱兢於太宗實錄外采其與羣臣問答之語作爲此書用備觀戒總四十篇新唐書著錄十卷均與今本合考舊唐書曹確傳載確奏臣覽貞觀故事太宗初定官品云云其文與此書擇官篇第一條相同而唐志所錄別無貞觀故事豈卽此書之別名歟其書在當時嘗經表進而不著年月惟兢自序所稱侍中安陽公者乃源乾曜中書令河東公者乃張嘉貞考玄宗本紀乾曜爲侍中嘉貞爲中書令皆在開元八年則兢成此書又在八年以後矣書中所記太宗事蹟以唐書通鑑參考亦頗見牴牾如新舊唐書載太宗作威鳳賦賜長孫無忌而此作賜房玄齡通鑑載張蘊古以救李好德被誅而此謂其與囚戲博漏洩帝旨事狀迥異又通鑑載皇甫德參上書賜絹二十四匹拜監察御史而此但作賜帛二十段又通鑑載宗室諸王降封由封德彝之奏貞觀初放宮人由

李百藥之奏而此則謂出於太宗獨斷俱小有異同史稱敘事簡核號良史而晚節稍疎悟此書蓋出其耄年之筆故不能盡免滲漏然太宗爲一代令辟其良法善政嘉言熾行臚具是編洵足以資法鑒前代經筵進講每多及之故中興書目稱歷代寶傳至今無闕伏讀皇上御製樂善堂集開卷首篇卽邀褒詠千年舊籍榮荷表章則是書之有裨治道亦概可見矣書中之注爲元至順四年臨川戈直所作又採唐柳芳晉劉昫宋宋祁孫甫歐陽脩曾鞏司馬光孫洙范祖禹馬存朱黼張九成胡寅呂祖謙唐仲友葉適林之奇真德秀陳惇脩尹起莘程奇及呂氏通鑑精義二十二家之說附之名曰集論吳澄郭思貞皆爲之序直字伯敬卽澄之門人也

〔卷目〕(一)論君道論政體(二)論任賢論求諫論納諫(三)論君臣

鑒戒論擇官論封建(四)論太子諸王定分論尊敬師傅論戒戒太

子諸王論規諫太子(五)論仁義論忠義論孝友論公平論誠信

(六)論儉約論謙讓論仁惻慎所好慎言語杜讒邪論悔過論奢縱
論貪鄙(七)崇儒學論文史論禮樂(八)論務農論刑法論赦令辯
興亡論貢賦(九)議征伐議安邊(十)論行幸論畋獵論災祥論慎

終

撫言

十五卷

〔著者小傳〕王定保南漢南昌人唐光化進士劉隱辟爲幕屬劉龔
時累官中書侍郎同平章事善文辭有唐撫言

〔四庫提要〕五代王定保撰舊本不題其里貫其序稱王溥爲從翁
則溥之族也陳振孫書錄解題謂定保爲吳融之壻光化三年進士
喪亂後入湖南五代史南漢世家稱定保爲邕管巡官遭亂不得還
劉隱辟置幕府至劉龔僭號之時尙在其所終則不得而詳矣考定
保登第之歲距朱溫篡唐僅六年又序中稱溥爲丞相則是書成於
周世宗顯德元年以後故題唐國號不復作內詞然定保生於咸通

庚寅至是年八十五矣是書蓋其暮年所作也同時南唐鄉貢士何晦亦有唐摭言十五卷與定保書同名今晦書未見而定保書刻於商氏稗海者刪削大半殊失其真此本爲松江宋賓王所錄末有跋語稱以汪士鋐本校正較稗海所載特爲完備近日揚州新刻卽從此本錄出惟是晁公武讀書志稱是書分六十三門而此本實一百有三門數目差舛不應至是豈商濬之前已先有刪本耶是書述有唐一代貢舉之制特詳多史志所未及其一切雜事亦足以覘名場之風氣驗士習之淳澆法戒兼陳可爲永鑒不似他家雜錄但記異聞已也據定保自述蓋聞之陸辰吳融李渥顏蕘王溥王渙盧延讓楊贊圖崔籍若等所談云

〔卷目〕共十五卷

宣和遺事

二卷

〔著者小傳〕係宋人所撰惟不知撰人姓名

〔本書略述〕此書似係南宋憤世之士所著故隱其名全書始王安石爲相迄秦檜掌權定都臨安而止於小人之誤國著之特詳以明徽欽蒙塵既有由來末謂高宗失恢復之機有二建炎之初黃潛善汪伯彥偷安目前誤之紹興以後秦檜爲虜用間誤之以致君父之大讎未報國家之大恥未雪尤屬扼要之論足爲後來殷鑑主書中純用當時通俗文字俚而不傷於雅非特爲稗史中之佳著並可爲今日之治語體文者通其郵也

〔卷目〕分前後兩集

靖康傳信錄

三卷

〔著者小傳〕李綱宋邵武人字伯紀政和進士靖康初爲兵部侍郎金人來侵力主迎戰被謫高宗卽位首召爲相修內治整邊防講軍政力圖恢復黃潛善等沮之七十餘日而罷卒諡忠定綱負天下重望以一身用舍爲社稷人民安危每宋使至燕山必問李綱趙鼎安

否其爲遠人畏服如此詩文雄深雅健以喜談佛理爲南宋諸儒所不道有易傳內外篇論語詳說梁溪集

〔本書略述〕靖康和戰之議實爲當時朝野聚訟之一大端時李綱方整率義旅以援王室凡朝廷論議靡不躬預其事屢以奏對不合求去此書卽錄其事之本末皆翔實可信自序言致寇之由有二失其所以戰並失其所以和以致賊志益侈無所忌憚又言以後非內外大小同心協力扶持宗社雖使寇退亦難支吾蓋痛當時士大夫溺於媮惰苟安媚嫉挑撥之習足以亡國語長心重不媿爲良史之紀載也

〔卷目〕共三卷

路史 四十七卷

〔著者小傳〕羅泌宋廬陵人字長源著路史遠涉皇古多採緯書及道家言不免龐雜然引據浩博文采瑰麗其國名紀考證尤精核

羅莘泌子

〔四庫提要〕宋羅泌撰泌字長源廬陵人是書成於乾道庚寅凡前

紀九卷述初三皇至陰康無懷之事後紀十四卷述太昊至夏履癸

之事國名紀八卷述上古至三代諸國姓氏地理下逮兩漢之末發

揮六卷餘論十卷皆辨難考證之文其國名紀第八卷載封建後論

一篇究言一篇必正劄子一篇國姓衍慶紀原一篇蓋以類相附惟

歸愚子大衍數一篇天衍說一篇四象說一篇與封建渺無所涉考

發揮第一卷之首有論太極一篇明易象象一篇易之名一篇與大

衍等三篇爲類疑本發揮之文校刊者以卷帙相連誤竄入國名紀

也泌自序謂皇甫謐之世紀譙周之史考張愔之系譜馬總之通曆

諸葛耽之帝錄姚恭年之歷帝紀小司馬之補史劉恕之通鑑外紀

其學淺狹不足取信蘇轍古史第發明索隱之舊未爲全書因著是

編餘論之首釋名書之義引爾雅訓路爲大所謂路史蓋曰大史也

句下註文題其子革所撰核其詞義與泌書詳略相補似出一手殆自註而嫁名於子與皇古之事本爲茫昧泌多採緯書已不足據至於太平經洞神經丹壺記之類皆道家依託之言乃一一據爲典要殊不免龐雜之譏發揮餘論皆深斥佛教而說易數篇乃義取道家其青陽遺珠一條論大惑有九以貪仙爲材者之惑諛物爲不材之惑尤爲偏駁然引據浩博文采瑰麗劉勰文心雕龍正緯篇曰羲農軒轅之源山瀆鍾律之要白魚赤鳥之符黃金紫玉之瑞事豐奇偉詞富膏腴無益經典而有助文章是以後來詞人採摭英華泌之是書殆於此類至其國名紀發揮餘論考證辨難語多精核亦頗有祛惑持正之論固未可盡以好異斥矣

〔卷目〕前紀（一至九）後紀（一至十三）餘論（一至十）發揮（一至六）（國名記甲乙丙丁戊己信各一卷）

長春真人西遊記

二卷 附附錄

〔著者小傳〕邱處機元棲霞人自號長春子年十九爲全真學於寧海之崑崙山師重陽王真人宋金之季俱遣使召不赴元太祖召之乃與弟子十八人往見於雪山以不嗜殺人及敬天愛民清心寡欲爲言太祖深契之賜宮名曰長春稱爲神仙卒贈長春演道主教真人其往返雪山時弟子李志常著西游記二卷

〔阮元四庫未收書目提要〕元李志常撰是編志常記其師邱處機西遊事蹟孫錫序云凡山川道里之險易水土風氣之差殊與夫衣服飲食百果草木禽蟲之別靡不畢載卷末附錄則載當時詔勅等篇處機字通密又號長春子棲霞人自幼住蟠溪龍門者十有三年金大定時曾自終南召令赴闕賜以巾冠待詔天長觀後放還山及元太祖時常召至雪山之陽眷渥倍至後復居燕之天長觀年八十餘著有磻溪集六卷此冊所載足資考證卽處機各詩亦清真平淡多可誦云

〔卷目〕分上下兩卷〔附附錄〕

聖武記 十四卷

〔著者小傳〕魏源清湖南邵陽人字默深道光二十四年進士官高郵州知州文筆奧衍熟於掌故尤精輿地之學治經以西漢今文爲宗與仁和龔自珍並稱龔魏有曾子章詩句古微書古微公羊微春秋繁露注聖武記海國圖志古微堂文集清夜齋詩集賀長齡所著皇朝經世文編亦源襄輯之力居多

〔本書略述〕魏氏源有良史才此書經三次修訂爲紀事本末體裁敘述綏服蒙古平定準回勘定金川撫循西藏諸役於一事之原因結果及其中間進展之次序若指諸掌實爲罕見之名著至後四卷所載武事餘記熟於有清一代掌故故持論具有本末其文筆健鍊尤爲餘事云

〔卷目〕(一)開創(二)藩鎮(三至六)外藩(七)土司苗徭回民(八)

海寇民變兵變(九)(十)教匪(十一至十四)武事餘記

華陽國志 十二卷 附錄一卷

〔著者小傳〕常璩晉江原人字道將於成漢嘉寧間官散騎常侍有華陽國志漢之書南中志

〔四庫提要〕晉常璩撰璩字道將江原人李勢時官至散騎常侍晉書載勸勢降桓温者卽璩蓋亦譙周之流也隋書經籍志霸史類中載璩撰漢之書十卷華陽國志十二卷漢之書唐志尙著錄今已久佚惟華陽國志存卷數與隋志舊唐志相合新唐志作十三卷疑傳寫誤也其書所述始於開闢終於永和三年首爲巴志次漢中志次蜀志次南中志次公孫劉二牧志次劉先主志次劉後主志次大同志大同者紀漢晉平蜀之後事也次李特雄期壽勢志次先賢士女總讚論次後賢志次序志次三州士女目錄宋元豐中呂大防嘗刻於成都大防自爲之序又有嘉泰甲子李至序稱呂刻闕觀者莫

曉所謂嘗博訪善本以證其誤而莫之或得因撫兩漢史陳壽蜀書益部耆舊傳互相參訂以決所疑凡一事而前後失序本末舛迤者則考正之一意而詞旨重複句讀錯雜者則刊而去之又第九卷末有至附記稱李勢志傳寫脫漏續成以補其闕則是書又於殘闕之餘李至爲之補綴竄易非盡璩之舊矣至刻本世亦不傳今所傳者惟影寫本又有何鏗漢魏叢書吳瑄古今逸史及明何宇度所刊三本何吳二家之本多張佳允所補江原常氏士女志一卷而佚去蜀中士女以下至犍爲士女共二卷蓋至本第十卷分上中下鏗等僅刻其下卷也又惟後賢志中二十人有讚其餘並闕至本則蜀郡廣漢犍爲漢中梓潼女士一百九十四人各有讚宇度本亦同蓋明人刻書好以意爲刊創新本旣行舊本漸泯原書遂不可覲宇度之本從至本錄出此二卷偶存亦天幸也惟至本以序志置於末而宇度本升於簡端考至序稱首述巴中南中之風土次列公孫述劉二牧

蜀二主之興廢及晉太康之混一以迄於特雄壽勢之僭竊以西漢以來先後賢人梁益寧三州士女總讚序志終焉則序志本在後宇度不知古例始誤移之又總讚相續成文至序亦與序志並稱宜別爲一篇而至本亦割冠各傳之首殊不可解殆如毛公之移詩序李鼎祚之分序卦傳乎今姑從至本錄之而附著其改竄之非如右其張佳允所續常氏士女十九人亦併從何鏗吳瑄二本錄入以補璩之遺焉

〔卷目〕(一)巴志(二)漢中志(三)蜀志(四)南中志(五)公孫述劉二牧志(六)劉先主志(七)劉後主志(八)大同志(九)李特雄期壽勢志(十)先賢士女總讚(十一)後賢志(十二)序志并益梁寧三州先漢以來士女目錄(附錄一卷)

十六國春秋 十六卷

〔著者小傳〕崔鴻後魏東清河鄆人字彥鸞博綜經史初爲尚書都

兵郎中後遷中散大夫以本官修輯國史孝昌初拜給事黃門侍郎齊州大中正尋卒鴻弱冠有志著述因劉淵石勒等十六國跨僭一方各有國書未有統一乃撰十六國春秋

〔四庫提要〕舊本亦題魏崔鴻撰載何鏗漢魏叢書中其出在屠喬孫本之前而亦莫詳其所自十六國各爲一錄惟列僭僞之主五十八人其諸臣皆不爲立傳全爲載記之體其非一百二卷之舊已不待言證以晉書載記大致互相出入而不以晉宋紀年與史通所說迥異豈好事者撫類書之語以晉書載記排比之成此僞本耶然考崇文總目有十六國春秋略二卷不著撰人名氏司馬光通鑑考異所引諸書亦有十六國春秋鈔之名則或屬後人節錄鴻書亦未可定也屠氏所刻百卷之本既爲依託此本亦疑以傳疑未能遽廢姑並存之以備參考焉

〔卷目〕(一)前趙錄(二)後趙錄(三)前燕錄(四)前秦錄(五)後秦

錄(六)蜀錄(七)前涼錄(八)西涼錄(九)北涼錄(十)後涼錄(十一)後燕錄(十二)南涼錄(十三)南燕錄(十四)西秦錄(十五)北燕錄(十六)夏錄

高士傳

三卷

〔著者小傳〕皇甫謐晉朝那人字士安年二十餘始就學居貧躬自稼穡帶經而農遂博綜典籍百家之言沉靜寡欲有高尙之志以著述爲務自號玄晏先生後得風痺疾猶手不釋卷武帝時累徵不起自表就帝借書帝送一車書與之所著詩賦誄頌論難甚多又撰帝王世紀年曆高士逸士列女等傳甲乙經玄晏春秋

〔四庫提要〕晉皇甫謐撰謐字士安自號玄晏先生安定朝那人漢太尉嵩之曾孫嘗舉孝廉不行事蹟具晉書本傳案南宋李石續博物志曰劉向傳列仙七十二人皇甫謐傳高士亦七十二人知謐書本數僅七十二人此本所載乃多至九十六人然太平御覽五百六

卷至五百九卷全收此書凡七十一人其七十人與此本相同又東郭先生一人此本無而御覽有合之得七十一人與李石所言之數僅佚其一耳蓋御覽久無善本傳刻偶脫也此外子州支父石戶之農小臣稷商容榮啓期長沮桀溺荷蓀丈人漢陰丈人顏觸十人皆御覽所引嵇康高士傳之文閔貢王霸嚴光梁鴻臺佟韓康矯慎法真漢濱老父龐公十人則御覽所引後漢書之文惟披衣老聃庚桑楚林類老商氏莊周六人爲御覽此部所未載當由後人雜取御覽又稍摭他書附益之耳考讀書志亦作九十六人而書錄解題稱今自披衣至管寧惟八十七人是宋時已有二本竄亂非其舊矣流傳既久未敢輕爲刪削然其非七十二人之舊則不可以不知也

〔卷目〕分上中下三卷

國朝先正事略

六十卷

〔著者小傳〕李元度清湖南平江人字次青一字笏庭自號天岳山

樵晚更號超然老人道光二十三年舉人官至貴州布政使工文稔掌故地理有四書廣義國朝先正事略南岳志國朝彤史名賢遺事錄天岳山館文鈔詩集

〔本書略述〕是書就清代先正分名臣名儒經學文苑遺逸循良孝義七門采其勳績論議嘉言懿行各著於篇於道光以前人物略具行文亦有法度其於漢宋學及文章流別不分門戶淵源所在各以類從凡議論之相反者均詳列之不作斷語以俟後人論定亦深合作史體例梁氏啓超謂學者宜取以瀏覽俾知最近二三百年史蹟大概惜咸同以後數十年尚無人能續之以成一代完書耳

〔卷目〕(一至二十六)名臣(二十七至三十一)名儒(三十二至三十六)經學(三十七至四十四)文苑(四十五至四十八)遺逸(四十九至五十四)循良(五十五至六十)孝義

中興將帥別傳 三十卷

〔著者小傳〕朱孔彰清長洲人字仲我光緒舉人所著書有說文通訓定聲續補遺釋說文讀若例說文重文箋說文粹論語孝經爾雅孟子古注彙輯三朝聞見錄中山王徐達傳注曾文正祠百詠中興將帥別傳

〔本書略述〕朱氏孔彰從曾文正國藩戎幕甚久一時曾幕人才皆與朱氏稔而戲下材官健兒亦與相狎習從詢兵間瑣事更得其詳乃上下其議論網羅咸同以來名臣將帥之行事參以目擊耳聞者成中興將帥別傳三十二卷兩朝勳臣事蹟略備下逮偏裨外附客將以及軼聞雜事採錄無遺與湘潭王氏闔運所著湘軍志時相驂靳孫氏衣言於當時東南軍事聞見頗悉謂證以此書所紀致多符合乃歎爲文直事覈可以傳信而不疑蓋亦良史才與李氏元度伯仲之間也

〔卷目〕共三十卷

陸宣公集

〔卽翰苑集〕

二十一卷增輯二卷

〔著者小傳〕陸贄唐嘉興人字敬輿年十八登進士第又中弘辭德宗時爲翰林學士甚見親任雖外有宰相主大議贄常居中參裁可否時號內相從幸奉天日詔書旁午皆出贄手武夫悍卒無不感泣累遷中書侍郎同平章事爲裴延齡所讒貶忠州別駕卒諡宣贄在朝論諫言皆剴切其奏議爲後世所宗有陸宣公翰苑集

〔四庫提要〕唐陸贄撰贄事蹟具唐書本傳案藝文志載贄議論表

疏集十二卷又翰苑集十卷常處厚纂陳振孫書錄解題載陸宣公集二十二卷中分翰苑膀子爲二集其目亦與史志相同惟晁公武讀書志所載乃祇有奏議十二卷且稱舊有膀子集五卷議論集三卷翰苑集十卷元祐中蘇軾乞校正進呈改從今名疑是裒諸集成此書與史志名目全不相合今考尤袤遂初堂書目所列實作翰苑集而錢曾讀書敏求記載所見宋槧大字本二十二卷者亦作翰苑

集則自南宋以後已合議論表疏爲一集而總題以翰苑之名公武所見乃元祐本恐非全冊而今世刊行贄集亦有題作陸宣公奏議者則又沿讀書志而失之者也宋祁作贄傳贄稱其論諫數十百篇譏陳時病皆本仁義炳炳如丹青而惜德宗之不能盡用故新唐書例不錄排偶之作獨取贄文十餘篇以爲後世法司馬光作資治通鑑尤重贄議論採奏疏三十九篇其後蘇軾亦乞以贄文校正進讀蓋其文雖多出於一時匡救規切之語而於古今來政治得失之故無不深切著明有足爲萬世龜鑑者故歷代寶重焉贄尙有詩文別集十五卷久佚不傳全唐詩所錄僅存試帖詩三首及語林所載逸句然經世有用之言悉具是書其所以爲贄重者固不必在雕章繪句之末矣

〔卷目〕(一至十)制誥(十一至十六)奏草(十七至二十二)中書奏議(二十三)(二十四)增輯

王氏合校水經注 四十卷附附錄

一珍佛宋版印

〔著者小傳〕酈道元後魏涿鹿人字善長太和中官東荊州刺史威猛爲治變民詣闕訟其刻峻坐免官久之復起爲河南尹安南將軍御史中尉時雍州刺史蕭寶夤反狀稍露侍中陽城王徽素忌道元因諷朝廷遣道元爲關右大使寶夤反力屈被執瞋目叱賊而死道元好學歷覽奇書撰水經注四十卷本志十三篇 王先謙清長沙人字益吾學者稱葵園先生同治進士官至國子監祭酒於學無所不究在史館成東華錄二百卷東華續錄四百十九卷視學江蘇成皇清經解續編一千四百三十卷其著述有尙書孔傳參正三家詩義集疏漢書補注後漢書集解新舊唐書合注元史拾補荀子集解莊子集解五洲地理圖志略日本源流考外國通鑑其撰集有合校水經注續古文辭類纂駢文類纂律賦類纂十家四六文鈔六家詞

鈔

〔本書略述〕水經舊題漢桑欽撰後魏酈道元注四庫提要據道元

序謂非桑欽所作乃削去舊題以志闕疑提要云自晉以來注水經者凡二家郭璞注三卷杜佑作通典時猶見之今惟道元所注存崇文總目稱其中已佚五卷故元和郡縣志太平寰宇記所引滹沱水洛水涇水皆不見於今書然今書仍作四十卷蓋宋人重刊分析以足原數也是書自明以來絕無善本惟朱謀埠所校盛行於世而舛謬亦復相仍今以永樂大典所引各案水名逐條參校非惟字句之譌層出疊見其中脫簡錯簡有自數十字至四百餘字者其道元自序一篇諸本皆佚亦惟永樂大典僅存蓋當時所據猶屬宋槧善本也謹排比原文與近代本鉤稽校勘凡補其闕漏者二千一百一十八字刪其妄增者一千四百四十八字正其臆改者三千七百一十五字神明煥然頓還舊觀三四百年之疑竇一旦曠若發蒙是皆我皇上稽古右文經籍道感嫫媿宛委之祕響然並臻遂使前代遺編

幸逢昌運發其光於蠹簡之中若有神物撝呵以待聖朝而出者是亦曠世之一遇矣至於經文注語諸本率多混淆今考驗舊文得其端緒凡水道所經之地經則云過注則云逕經則統舉都會注則兼及繁碎地名凡一水之名經則首句標明後不重舉注則文多旁涉必重舉其名以更端凡書內郡縣經則但舉當時之名注則兼考故城之迹皆尋其義例一一釐定各以案語附於下方至塞外羣流江南諸派道元足迹皆所未經故於灤河之正源三藏水之次序白檀要陽之建置俱不免附會乖錯甚至以浙江妄合姚江尤爲傳聞失實自我皇上命使履視盡得其脈絡曲折之詳御製熱河考灤源考證諸篇爲之抉摘舛謬條分縷擘足永訂千秋耳食沿譌謹錄弁簡永昭定論又水經作者唐書題曰桑欽然班固嘗引欽說與此經文異道元注亦引欽所作地理志不曰水經觀其涪水條中稱廣漢已爲廣魏則決非漢時鍾水條中稱晉寧仍曰魏寧則未及晉代推尋

文句大抵三國時人今既得道元原序知並無桑欽之文則據以削去舊題亦庶幾闕疑之義云爾

以上四庫提要語

按酈氏水經注傳寫譌舛

由來已久諸家藏本均有校讎其中瑕疵互見而大致不甚相遠四庫著錄之本係戴震預修四庫全書哀集永樂大典就所引水經注排比鉤稽而成卽所稱官校宋本是也此外入著錄者惟趙一清之水經注釋四十卷刊誤十二卷稱爲自官校宋本而外外間諸刻不能不以是爲首此本係長沙王氏先謙合校本大致以官校宋本朱謀瑋箋本趙一清注釋本孫星衍校本爲綱而盧紹弓校宋本董祐誠圖說丁履恆游水疏證謝鍾英洛涇二水補等亦爲博徵采用合諸家所長於一編之中成此鉅製殆汪氏中所謂在於四累之上天下古今無二者也至全氏祖望七校水經注晚出浙中據王氏自稱因林頤山斥其僞造抉摘罅漏至數十事故此編一字不敢闌入

〔卷目〕(一至五)河水(六)汾水等(七)(八)濟水(九)清水等(十)

濁漳水等(十一)易水等(十二)聖水等(十三)灤水(十四)濕餘水等(十五)洛水等(十六)穀水等(十七至十九)渭水等(二十)漾水等(二十一)汝水(二十二)潁水等(二十三)陰溝水等(二十四)睢水等(二十五)泗水等(二十六)沫水等(二十七至二十九)沔水等(三十)淮水(三十一)澧水等(三十二)滲水等(三十三至三十五)江水(三十六)青衣水等(三十七)淹水等(三十八)資水等(三十九)涇水等(四十)漸江水等(卷末附錄)

洛陽伽藍記

五卷附集證一卷

〔著者小傳〕楊銜之後魏時人官撫軍府司馬著有洛陽伽藍記清

光緒間順德李氏文田據廣弘明集第六卷證爲北平人官終秘書

監并謂史通楊作羊當是傳寫之誤通考又誤襲之耳 吳若準清

錢塘人字次平

〔四庫提要〕後魏楊銜之撰劉知幾史通作羊銜之晁公武讀書志

亦同然隋志亦作楊與今本合疑史通誤也其里貫未詳據書中所稱知嘗官撫軍司馬耳魏自太和十七年作都洛陽一時篤崇佛法刹廟甲於天下及永熙之亂城郭邱墟武定五年銜之行役洛陽感念廢興因捃拾舊聞追敘故蹟以成是書以城內及四門之外分敘五篇敘次之後先以東面三門南面三門北面三門各署其新舊之名以提綱領體例絕爲明晰其文穠麗秀逸煩而不厭可與酈道元水經注肩隨其兼敘爾朱榮等變亂之事委曲詳盡多足與史傳參證其他古迹藝文及外國土風道里採摭繁富亦足以廣異聞劉知幾史通云秦人不死驗苻生之厚誣蜀老猶存知葛亮之多枉蜀老事見魏書毛修之傳秦人事卽用此書趙逸一條知幾引據最不苟知其說非鑿空也他如解魏文之苗茨碑糾戴延之之西征記考據亦皆精審惟以高陽王雍之樓爲卽古詩所謂西北有高樓上與浮雲齊者則未免固於說詩爲是書之瑕類耳據史通補註篇稱除煩

則意有所悞畢載則言有所妨遂乃定彼榛楛列爲子註若蕭大圜
淮海亂離志羊銜之洛陽伽藍記是也則銜之此記實有自註世所
行本皆無之不知何時佚脫然自宋以來未聞有引用其註者則其
刊落已久今不可復考矣

〔卷目〕(一)城內(二)城東(三)城南(四)城西(五)城北(附集證

一卷)

荆楚歲時記

不分卷

〔著者小傳〕宗懷北周涅陽人居江陵字元懷少聰敏鄉里呼爲小

兒學士梁元帝鎮荊州令兼記室遷吏部尚書入周封信安縣侯累
拜車騎大將軍明帝時與王褒等在麟趾殿勘定羣書有荆楚歲時
記及集

〔四庫提要〕舊本題晉宗懷撰書錄解題作梁人考梁書元帝本紀

載承聖三年秋七月甲辰以都官尚書宗懷爲吏部尚書又南史元

帝本紀載武陵之平議者欲因其舟艦遷都建鄴宗懷黃羅漢皆楚人不願移此書皆記楚俗當即其人舊本題晉人誤也唐宋志皆作一卷與今本合而通考乃作四卷考書錄解題載懷自序曰傳玄之朝會杜篤之上巳安仁秋興之敘君道娛蜡之述其屬辭則已洽其比事則未宏率爲小說以錄荆楚歲時風物故事自元日至除日凡二十餘事然則必無四卷知通考爲傳寫之譌又檢今本實有二十六事并知陳振孫所記懷序亦以三字譌爲二字然周密癸辛雜識引張騫乘槎至天河見織女得支機石事云出荆楚歲時記今本無之則三十六事尙非完本也其註相傳爲隋杜公瞻作故多引開皇中杜臺卿玉燭寶典然唐志宗懷荆楚歲時記一卷下又出杜公瞻荆楚歲時記二卷豈原書一卷公瞻所註分二卷後人又合之歟

〔卷目〕不分卷

漢官六種

漢王隆撰胡廣注漢官一卷漢官解詁一卷漢官舊儀二卷補遺二卷應劭漢官

儀二卷蔡質漢官典職儀式選用一卷吳
丁孚漢儀一卷

〔著者小傳〕王隆漢雲陽人字文山王莽時為郎後避難河西為竇

融左護軍建武中為新汲令能文章有詩賦銘書凡二十六篇 胡

廣漢華容人字伯始安帝時舉孝廉為天下第一旬月拜尚書郎累

遷司徒以定策立桓帝封育陽安樂鄉侯復拜太尉遷太傅卒諡文

恭 衛宏漢東海人字敬仲一曰字次仲光武時為議郎少從九江

謝曼卿受毛詩作詩序善得風雅之旨後更受古文尚書於杜林為

作訓旨時濟南徐巡師事宏亦以儒顯由是古學大興宏又作漢舊

儀四篇以載西京雜事 應劭漢南頓人字仲遠少博學舉孝廉拜

泰山太守連破黃巾郡內以安獻帝遷都於許詔劭為袁紹軍謀校

尉時舊章湮沒書記罕存劭綴集所聞著漢官儀及禮儀故事又撰

風俗通以辨物類名號釋時俗嫌疑文雖不典後世服其洽聞卒於

鄴 蔡質漢圉人邕叔父字子文官衛尉 丁孚三國吳人官太師

令 孫星衍（見經部）

〔本書略述〕孫氏星衍所集漢官六種內僅漢舊儀收列四庫書目證明係衛宏所撰惟仍以漢官標題其餘五種不見著錄孫氏搜輯佚書而成裨益後學厥功甚偉張文襄之洞書目答問特採此書入史目政書類蓋以此六種皆有關古制爲歷朝官制之濫觴非特爲研究漢史者所宜亟讀也

〔卷目〕漢官（一）漢官解詁（一）漢舊儀（二）漢舊儀補遺（二）漢官儀（二）漢官典職儀式選用（一）漢儀（一）

通志二十略 五十二卷

〔著者小傳〕鄭樵宋莆田人字漁仲博學強記搜奇訪古遇藏書家必借留讀盡乃去初爲經旨禮樂文字天文地理蟲魚草木方書之學皆有論辨紹興中以薦召對授右迪功郎禮兵部架閣言者劾之改監南嶽廟給札歸鈔所著通志書成入爲樞密院編修官樵居夾

滌山學者稱夾滌先生又自號西溪逸民

〔四庫提要〕宋鄭樵撰樵有爾雅註已著錄通史之例肇於司馬遷故劉知幾史通述二體則以史記漢書共爲一體述六家則以史記漢書別爲兩家以一述一代之事一總歷代之事也其例綜括千古歸一家言非學問足以該通文章足以鎔鑄則難以成書梁武帝作通史六百二十卷不久卽已散佚故後有作者率莫敢措意於斯樵負其淹博乃網羅舊籍參以新意撰爲是編凡帝紀十八卷皇后列傳二卷年譜四卷略五十一卷列傳一百二十五卷其紀傳刪錄諸史稍有移掇大抵因仍舊目爲例不純其年譜仿史記諸表之例惟閒以大封拜大政事錯書其中或繁或漏亦復多岐均非其注意所在其平生之精力全帙之菁華惟在二十略而已一曰氏族二曰六書三曰七音四曰天文五曰地理六曰都邑七曰禮八曰諡九曰器服十曰樂十一曰職官十二曰選舉十三曰刑法十四曰食貨十五

曰藝文十六曰校讎十七曰圖譜十八曰金石十九曰災祥二十曰草木昆蟲其氏族六書七音都邑草木昆蟲五略爲舊史之所無案史通書志篇曰可以爲志者其道有三一曰都邑志二曰氏族志三曰方物志樵增氏族都邑草木昆蟲三略蓋竊據是文至於六書七音乃小學之支流非史家之本義矜奇炫博泛濫及之此於例爲無所取矣餘十五略雖皆舊史所有然諡與器服乃禮之子目校讎圖譜金石乃藝文之子目析爲別類不亦冗且碎乎且氏族略多挂漏六書略多穿鑿天文略祇載丹元子步天歌地理略則全鈔杜佑通典州郡總序一篇前雖先列水道數行僅雜取漢書地理志及水經注數十則卽禹貢山川亦未能一一詳載諡略則別立數門而沈約扈琛諸家之諡法悉刪不錄卽唐會要所載杲字諸諡亦並漏之器服略器則所載尊彝爵觶之制制旣不詳又與金石略複出服則全鈔杜佑通典之嘉禮其禮樂職官食貨選舉刑法六略亦但刪錄通

典無所辨證至職官略中以通典註所引之典故悉改爲案語大書更爲草率矣藝文略則分門太繁又韓愈論語解論語類前後兩出張弧素履子儒家道家兩出劉安淮南子道家雜家兩出荆浩筆法記乃論畫之語而列於法書類吳興人物志河西人物志乃傳記之流而列於名家類段成式之玉格乃酉陽雜俎之一篇而列於寶器類尤爲荒謬金石略則鐘鼎碑碣核以博古考古二圖集古金石二錄脫略至十之七八災祥略則悉鈔諸史五行志草木昆蟲略則并詩經爾雅之註疏亦未能詳核蓋宋人以義理相高於考證之學罕能留意樵恃其該洽睥睨一世諒無人起而難之故高視闊步不復詳檢遂不能一一精密致後人多所譏彈也特其採摭旣已浩博議論亦多警闢雖純駁互見而瑕不掩瑜究非游談無根者可及至今資爲考鏡與杜佑馬端臨書並稱三通亦有以焉

〔卷目〕(一至六)氏族略(七至十一)六書略(十二)(十三)七音略

(十四)(十五)天文略(十六)地理略(十七)都邑略(十八至二十一)禮略(二十二)謚略(二十三)(二十四)器服略(二十五)(二十六)樂略(二十七至三十二)職官略(三十四)(三十五)選舉略(三十六)刑法略(三十七)(三十八)食貨略(三十九至四十六)藝文略(四十七)校讎略(四十八)圖譜略(四十九)金石略(五十)災祥略(五十一)(五十二)昆蟲草木略

歷代職官表 七十一卷

〔著者小傳〕永瑤清高宗六子封多羅質郡王善畫山水工詩有九思堂詩鈔此書係永瑤等奉敕修纂

〔四庫提要〕乾隆四十五年奉敕撰粵自龍鳥水火肇建官各然夏商以前書闕有闕遺制不盡可考其可考者惟周禮爲最詳迨秦漢內設九卿外制列郡而官制一變東京以後事歸臺閣雖分置尙書六部而政在中書其權獨重漢魏之制至唐宋而又一變明太祖廢

中書省罷丞相盡歸其職於六部永樂閒復設內閣而參以七卿唐
宋之制至是而又一變矣其閒名號品數改革紛繁大抵勢足以相
維則乾綱不失權有所偏屬則魁柄必移故官制之得失可以知朝
政之盛衰也我國家稽古建官循名核實因革損益時措咸宜我皇
上朗照無私權衡獨秉舉直錯枉宮府肅清尤從來史冊所未有復
念歷朝官制典籍具存宜備溯源流明其利弊庶前規可鑑法戒益
昭乃特命四庫全書館總纂官內閣學士今陞兵部右侍郎 臣紀昀
光祿寺卿今陞大理寺卿 臣陸錫熊翰林院編修今陞山東布政使
臣孫士毅總校官詹事府少詹事今陞內閣學士 臣陸費墀等考證
排次輯綴是編分目悉準今制凡長貳僚屬具列焉明綱紀也其兼
官無正員而所掌綦重如軍機處之類亦別有專表崇職守也八旗
及新疆爵秩前所未有者並詳加臚考著聖代之勅建遠邁邃古也
或古有而今無或先置而後廢並爲採掇別附於篇備參訂也每門

各冠以表表後詳敘建置首列國朝略如唐六典之例次以歷代則節引諸書各附案語以疏證其異同上下數千年分職率屬之制元元本本罔弗具焉考將相及百官公卿之有表始自馬班二史後如唐書之宰相表宋史之宰輔表明史之內閣七卿表俱沿其例然所紀僅拜罷年月與官制無關且斷代爲書不通貫尋檢頗難至鈔撮故實如孫逢吉職官分紀之類又但供詞藻於實政無裨是書發凡起例悉稟睿裁包括古今貫串始末旁行斜上援古證今經緯分明參稽詳密不獨昭垂奕禩爲董正之鴻模卽百爾臣工各明厥職用以顧名而思義亦益當知所做勛矣

〔卷目〕(一)宗人府(二至四)內閣(五)吏部(六)戶部(七)戶部三

庫(八)戶部倉場衙門(九)禮部(十)樂部(十一)禮部會同四譯

館(十二)兵部(十三)刑部(十四)(十五)工部(十六)戶工二部

錢局(十七)理藩院(十八)(十九)都察院(二十)五城(二十一)

通政使司(二十二)大理寺(二十三)翰林院(二十四)經筵日講
起居注官(二十五)文淵閣閣職(二十六)詹事府(二十七)太常
寺(二十八)壇廟各官(二十九)陵寢各官(三十)光祿寺(三十
一)太僕寺(三十二)順天府(三十三)鴻臚寺(三十四)國子監
(三十五)欽天監(三十六)太醫院(三十七)(三十八)內務府
(三十九)內務府上駟院(四十)內務府奉宸院(四十一)內務府
武備院(四十二)鑾儀衛(四十三)領侍衛內大臣(四十四)八旗
都統(四十五)前鋒護軍統領(四十六)步兵統領(四十七)火器
健銳虎鎗各營(四十八)盛京將軍等官(四十九)盛京五部等官
(五十)總督巡撫(五十一)學政(五十二)司道(五十三)知府直
隸州知州等官(五十四)知州知縣等官(五十五)各省駐防將軍
(五十六)提督(五十七)總兵副將(五十八)參將遊擊等官(五
十九)河道各官(六十)漕運各官(六十一)鹽政(六十二)關稅

各官(六十二)各處駐劄大臣(六十四)宗室封爵(六十五)世爵
世職(六十六)聖賢後裔(六十七)師傅保加銜(六十八)文武官
階(六十九)王府各官(七十)新疆各官(七十一)藩屬各官(七
十二)土司各官

吾學錄初編 二十四卷

〔著者小傳〕吳榮光清南海人字荷屋號伯榮嘉慶進士由編修擢
御史巡視天津漕務肅清積弊道光間官至湖南巡撫平江華瑤有
功兼署湖廣總督坐事降福建布政使工書畫精鑑金石有歷代名
人年譜筠清館金石錄白雲山人詩稿吾學錄綠珈南館諸集

〔本書略述〕此書取大清會典通禮刑部律例五部則例學政全書
等書於人心風俗之所關政教倫常之衆著者分別節錄內於喪禮
律例等門引徵尤詳有清一代制度大略已備於是較之雜採禮書
繁而失當者度越遠矣

〔卷目〕(一)典制門(二)政術門(三)風教門(四)學校門(五)貢舉門(六)戎政門(七)仕進門(八)制度門(九至十一)祀典門(十二)賓禮門(十三)昏禮門(十四)祭禮門(十五至十九)喪禮門(二十至二十四)律例門

史通通釋 二十一卷

〔著者小傳〕劉知幾唐彭城人字子玄與兄知柔俱以善文辭知名擢進士第領國史垂三十年自負史才著史通內外四十九篇譏評今古議者高其博嘗言史有三長才學識世罕兼之時以爲篤論會子貺抵罪知幾請於執事玄宗怒貶安州別駕卒諡文有集 浦起龍清無錫人字二田雍正進士官蘇州府教授有史通通釋讀杜心解

〔四庫提要〕國朝浦起龍撰起龍字二田無錫人雍正甲辰進士官蘇州府教授史通註本舊有郭延年王維儉二家近時又有黃叔琳

註補郭王之所闕遞相增損互有短長起龍是註又在黃註稍後故亦採用黃註數條然頗糾彈其疎舛其中如曲筆篇稱秦人不死驗苻生之厚誣蜀老猶存知葛亮之多枉三家皆不註起龍亦僅引困學紀聞謂王應麟不知所出定爲無考而不知秦人事出洛陽伽藍記蜀老事出魏書毛修之傳又如闌單失力但引盧照鄰賦旁證而不知清異錄實有訓釋不煩假借小小疎漏亦不能無然大致引據詳明足稱該洽惟疑古惑經諸篇更助頽波殊爲好異又輕於改竄古書往往失其本旨如六家篇尙書條中語無可述四字之下若此二字之上顯有脫句而改此字爲止字更臆增一有字又如列傳篇項王立傳而以本紀爲各句立字不誤而乃臆改爲宜字此類至多皆失詳慎至於句解章評參差連寫如坊刻古文之式於註書體例更乖使其一評一註釐爲二書則庶乎離之雙美矣

〔卷目〕(一至十)內篇(十一至二十)外篇

讀通鑑論 三十卷 附敘論

〔著者小傳〕王夫之明湖南衡陽人字而農號薑齋年逾冠與兄介之同舉崇禎壬午鄉試後清師下湖南夫之走桂林大學士瞿式耜薦於桂王授行人尋歸隱衡陽之石船山築土室曰觀生居杜門著書學者稱船山先生夫之論學以漢儒爲門戶宋五子爲堂奧尤神契張載之學所著船山全集凡三百二十四卷

〔本書略述〕論史最忌空談尤忌苛論昔王應麟謂胡寅讀史管見但就一事詆斥不究其事之始末又多假借論端自申己說凡所論是非往往枝蔓於本事以外誠屬篤論蓋經世家之史論與文章家之史論不同此書及後宋論皆博通明達高挹羣言往往論一事而闡明其關係至數百年之久卓然爲經世家言其宋論中於和戰之得失君子小人之水火深致憤慨尤足爲後來炯戒至文筆之曲折馳驟猶其餘事耳

〔卷目〕讀通鑑論(一)秦始皇(二)漢高帝等(三)景帝等(四)昭帝等(五)成帝等(六)漢更始等(七)明帝等(八)順帝等(九)獻帝(十)三國(十一)晉(十二)惠帝等(十三)元帝等(十四)哀帝等(十五)宋武帝等(十六)齊高帝等(十七)梁武帝等(十八)陳高祖等(十九)隋文帝等(二十)唐高祖等(二十一)高宗等(二十二)睿宗等(二十三)肅宗等(二十四)德宗等(二十五)順宗等(二十六)穆宗等(二十七)懿宗等(二十八至三十)五代(附敘論)

宋論 十五卷

〔著者小傳〕王夫之(見前)

〔本書略述〕見前讀通鑑論

〔卷目〕(一)太祖(二)太宗(三)真宗(四)仁宗(五)英宗(六)神宗(七)哲宗(八)徽宗(九)欽宗(十)高宗(十一)孝宗(十二)光宗(十三)甯宗(十四)理宗(十五)度宗等

文史通義 八卷

〔著者小傳〕章學誠清浙江會稽人字實齋乾隆四十三年進士官國子監典籍性耽墳籍不甘爲章句之學所著有文史通義八卷校讎通義三卷其中倡言立論多前人所未發大抵推原官禮而有得於向歆父子之傳故於古今學術之原輒能條別而得其宗旨自謂卑論仲任俯視子玄未免過詡然亦夾漈之伯仲也又著有實齋文集

〔本書略述〕章氏學誠以時人讀書如捧散錢苦無貫索乃著文史通義內外篇其論史謂有史才史學尤貴有史德其論文謂有文情文心尤貴有文性外篇專論志書謂方志宜分三書做紀傳正史之體作志做律令典例之體作掌故做文選文苑之體作文徵三書相輔而行闕一不可合而爲一尤不可又謂修志當乘二便盡三長去五難除八忌立四體以歸四要皆切中利病胡氏文虎稱爲有良史

才梁氏啓超亦稱此書雖以文史標題實多論學術源流之語均非阿諛之詞也

〔卷目〕（一至五）內篇（六至八）外篇

校讎通義 三卷

〔著者小傳〕章學誠（見前）

〔本書略述〕校讎之義始自劉向父子然去古太遠所謂七略別錄久已失傳此書大致在正鄭氏樵之失而折衷諸家正其源委於學術淵源洞然見其本末非僅僅治目錄學者所能望其肩背也此與文史通義皆爲求學最善之門徑書可稱學術界之雙璧

〔卷目〕共三卷

歷代史表 五十九卷

〔著者小傳〕萬斯同清鄞縣人字季野號石園其學以慎獨爲主專意古學博通諸史尤熟於明代掌故康熙中薦博學鴻詞科不就後

以布衣參史局明史稿五百卷皆其手定又爲尙書徐乾學纂讀禮通考二百餘卷性不樂榮利見人惟以讀書勵名節相切劘及卒門人私謚貞文先生有歷代史表紀元彙考宋季忠義錄南宋六陵遺事庚申君遺事河源考河渠考儒林宗派石經考石鼓文考羣書辨疑書學彙編周正彙考歷代宰輔彙考石園詩文集

〔四庫提要〕國朝萬斯同撰斯同有廟制圖考已著錄是編以十七

史自後漢書以下惟新唐書有表餘皆闕如故各爲補撰宗史記前漢書之例作諸王世表外戚侯表外戚諸王世表異姓諸王世表將相大臣及九卿年表宗新唐書之例作方鎮年表諸鎮年表其宦者侯表大事年表則斯同自創之例也其書自正史本紀志傳以外參考唐六典通典通志通鑑冊府元龜諸書及各家雜史次第彙載使列朝掌故端緒釐然於史學殊爲有助考自宋以前唯後漢書有熊方所補年表他如鄭樵通志年譜僅記一朝大事及正閏始末其於

諸王將相公卿大臣興廢拜罷之由率略而不書近人作十六國年表亦多舛漏其網羅繁富類聚區分均不及斯同此書之賅備惟晉書既補功臣世表則歷代皆所當補十六國如成趙燕秦既有將相大臣年表則十國如南唐南漢北漢閩蜀不當獨闕又魏將相大臣中不載上大將軍五代諸王世表獨闕後漢註謂後漢子弟未嘗封王然考承訓追封魏王承勳追封陳王與後周郟杞越吳諸王事同一例何以獨削而不登是皆其偶有脫略者然核其大體則精密者居多亦所謂過一而功十者矣

〔卷目〕(一至四)東漢(五至十一)三國(十二至二十七)晉(二十八至三十)宋(三十一至三十三)齊(三十四)(三十五)梁(三十六)(三十七)陳(三十八至四十二)魏(四十三)(四十四)北齊(四十五)(四十六)周(四十七)(四十八)隋(四十九至五十九)

五代

歷代帝王年表 十四卷

一 珍 依 宋 彭 均

〔著者小傳〕齊召南清天台人字次風號瓊臺晚號息園雍正副貢乾隆初舉鴻博授庶吉士累官禮部侍郎坐事削職召南幼稱神童書一覽即記最精輿地之學嘗以酈道元水經注開於西北闡於東南著水道提綱盛行於時又有史漢侯第考後漢公卿表歷代帝王年表寶綸堂賜硯堂詩文集等書 阮福清儀徵人有孝經義疏補注

〔本書略述〕此書始自三皇迄元代順帝其有明一代阮氏福續之以上敘世秦以後敘年簡括明晰略識其治亂得失使數千年之興亡分合展卷瞭如足爲讀正史者檢討之助

〔卷目〕(一)三王五帝三代表(二)秦六國年表(三)秦年表(四)前漢年表(五)後漢年表(六)蜀漢魏吳年表(七)晉東晉^{十六}年表

(八)南北朝^南宋^齊梁^陳年表(九)隋年表(十)唐年表(十一)後

五代十國年表(十二)宋南宋遼金年表(十三)元年表(十四)明

年表

歷代帝王廟謚年諱譜 不分卷

〔著者小傳〕陸費墀清桐鄉人字丹叔乾隆進士授編修歷充四庫全書館總校及副總裁等官又偕紀文達昉等編纂歷代職官表並編有歷代帝王廟謚年諱譜

〔本書略述〕此書始漢劉氏迄明福王由崧分廟謚等七類縱橫排列極易緝檢書中於所避之字如改恆農爲宏農改啓蟄爲驚蟄於兼避之字如避詢則改荀子爲孫子避忠則改中國爲神州皆根據羣籍羅列無遺非特研究古書者宜取以考證卽研究金石碑版文字者亦可作爲參考書籍以灼知時代證明真僞也

〔卷目〕不分卷

歷代統紀表疆域表沿革表 十九卷

〔著者小傳〕段長基清偃師人字西崖

〔本書略述〕太史公年表旁行斜上體仿周譜知史表實爲三代之舊法段氏長基邃於史學乃仿太史公表式取二十四史所載世紀疆域及沿革諸大端彙輯成書其義例具詳各表卷首及凡例中翦裁得體敘事亦極明顯誠韓愈所謂紀事必提其要歐陽修所謂春秋之文簡而有法者也讀史者苟能精此一編則津逮孔多矣

〔卷目〕統紀表（一至十三）疆域表上中下三卷沿革表上中下三卷
歷代紀元編 三卷

〔著者小傳〕李兆洛清江蘇武進人字申耆嘉慶十年進士官鳳臺知縣工詩古文精考證尤長於輿地之學罷官後主講真儒暨陽諸書院成就人才甚衆所輯有皇朝文典七十卷大清一統輿地全圖鳳臺縣志地理韻編駢體文鈔舊言集初編次編廣編所著有養一

齋文集二十卷

〔本書略述〕歷代甲子前人每多編輯其編輯之法各有不同而皆不便檢查此書分紀元總載紀元甲子表而殿以紀元編韻彼此互參簡約明瞭使人一檢卽得其總載內所附歷代僭竊年號及外國年號道經雜記所載年號擬議不用年號錢文年號均爲他書所未見

〔卷目〕(上)紀元總載(中)紀元甲子表(下)紀元編韻(附紀元編韻補)

歷代地理志韻編今釋 二十卷

〔著者小傳〕李兆洛(見前)

〔本書略述〕輿地之學爲治史之要義顧史實紛紜驟不可理如京兆南陵師古以爲寧國九江當塗章華謂在姑孰其變亂訛淆之處難以悉舉李氏兆洛精於史地之學爰取正史之有地志者十有四部析其郡縣之名編以歸韻旣得實地之所在乃會前代郡縣注之

分隸各韻極便檢查書閱十餘年而後成前人爲其勞而後人享其逸其嘉惠來學之功誠匪淺尠矣

〔卷目〕(一至五)上平(六至十一)下平(十二至十四)上聲(十五至十七)去聲(十八至二十一)入聲

廿二史劄記

三十六卷附補遺

〔著者小傳〕趙翼清江蘇陽湖人字耘松一字雲菘號甌北由直隸商籍舉乾隆十五年鄉試十九年中明通榜用內閣中書入直軍機處進奉文字多出其手二十六年以一甲三名進士授翰林院編修累官至廣西鎮安府知府後因廣州讞獄舊案部議降級奉旨送部引見翼遂以母老乞歸不復出晚歲以著述自娛尤邃於史學所撰廿二史劄記鉤稽同異屬詞比事其於前代弊政一篇之中三致意焉又撰有陔餘叢考甌北詩集皇朝武功紀盛檐曝雜記唐宋十家詩話嘉慶十五年重宴鹿鳴賜三品銜十九年卒年八十八

〔本書略述〕記稱屬辭比事春秋之教此書深得比事之旨於每一標題下其資料皆由數十處傳中雜采而成其古今風會之變遷政事之沿革凡有關於治亂興衰之故者亦隨所見附著之至書中校勘文字異同之處尤便後學其中如遼金元史人名譯音經清朝官書之改竄者爲之一一臚舉舊譯作某新譯作某可以對照一目瞭然在清代史學書中其實用蓋在錢大昕廿二史考異王鳴盛十七史商榷上也

〔卷目〕(一至三)史記漢書(四)(五)後漢書(六)三國志(七)三國志晉書(八)晉書(九)宋齊梁陳書(十至十二)宋齊梁陳書并南史(十三至十五)魏齊周隋書并北史(十六至二十)新舊唐書(二十一)(二十二)五代史(二十三)宋遼金史(二十四至二十六)宋史(二十七)遼史金史(二十八)金史(二十九)(三十)元史(三十一至三十六)明史(附補遺)

